

Ayao Kovo Amisy YOHANES

Ayao mo kove raunande

¹ Arono manasyin dave munijo akoe tename so ranari rainy, Yesus Kristus, apa tame mi Ayao Amisy, opamo no wusyimbe to. Wepe Amisy pe inya kava. Muno Po Injayo Amisye amaisy.

² Arono manasyin dave, Wepamo no Amisye autan to.

³ Wepi po anakotaro mine so ranari tenambe. Muno anakotare inta pora nande taune amave jeben, yara Yesus Kristus po ranari tenambe.

⁴ Kovo nuge nuganui ama ruke no irati Ai, muno kove so maisyare varo mbaro vatano una no mine so mansai. ⁵ Varo namije mbaro kaumuro mine so rai muno kaumure umaso mbambunin da mo rapamo kakai.*

⁶ Amisy po vatane inta atutir de, apa tame mi Yohanes. ⁷ Muno Yohanes de po varo namije raura kakavimbe, indamu vatan tenambe wanave.

⁸ Weramu Yohanes wepirati vare opa jewena, yara wepirati de po vare umaso raura kakavimbe.

⁹ Varo kakui mo vatan tenambe mavar nde no mine so, wepamo Yesusa pije.

¹⁰ Yesus Kristus no no mine so muno Wepi po mine so ranari vintabo, weramu vatano mine so wantukambe Ai. ¹¹ De no taune Apa munije rai,

* **1:5** Kaumure raurata irati anakotaro ngkakai rai, yara vare raurata irati ana ngkove rai. Raen no 1 Yohanes 1:5-10.

weramu Apa kawasae wonayo Ai. ¹² Weramu vatano are nawirati manuga raneka wo augav muno wanave irati Ai, onawamo Amisye po varore raugaje mai indamu Apa arikainye waino mansai. ¹³ Amisye apa arikainye waino mansai omamo maisyare vatane ibaunam ti yo arikainye mansaen omaisya jewen, muno anya beker wanya inta rai ti mo arikainye mavaki ma jewen tavon. Yara Amisye taune po vambunine raunande mai indamu Apa arikainye waino mai.

¹⁴ Yesus umaso, Apa tame mi Ayao Amisy, opamo be vatanbe to, paje ti pe wana no mine so. Muinye manakoe no Ai muno Apa ayao mamu tugae rave. Muno Apa kovo ntiti mamu reandaen to. Opamo Injayo Amisy apa Arikainyo intabo dave weti Amisye apa kovo ntiti no Ai vintabo.

¹⁵ Yohanes po Yesus aura kakavimbe. Po rawaino anamoto manakoe rai pare, “Napiso pirati syo aura syare Opamo indati po inarija de, weramu Opamo panakoe inakivan weye arono rino no mine so rainyamo Opamo no to.”

¹⁶ Muinye manakoe no Ai, weti Po kove raugaje wansai tutir. ¹⁷ Amisye po Musa atutir indamu po ananyao raugaje vatane mansai, weramu po Yesus Kristus atutir indamu Po apa muinye muno Apa ayao tugae rarorono wansai. ¹⁸ Vatane wamamo inta po Amisye aeno amije rai intai ma jewen tenambe. Yara Amisye apa Arikainyo intabo wepi po Injayo Amisye aroron kakavimbe irati wansai, weye Arikainye umaso po Injayo Amisye amaisy muno be intabove Ai.

*Yohanes Pembaptis po taune aura kakavimbe
(Matius 3:1-12; Markus 1:1-8; Lukas 3:3-6, 15-17)*

¹⁹ Akarijo Yahudi una no Yerusalem wo syene muno vatano Lewi inta† matutir wuruta wo Yohanes anajo taiso: “Winyamo are pi winy?”

²⁰ Naije Yohanes po taune aura kakavimbe pare, “Mesias wepi risya jewena.”

²¹ Wo anajo akato ware, “Maisyare omaisyamo, winyamo are pi winy? Indako winyamo Elia pi winy e?”

Yohanesa pare, “Jewen.”

“Indako winyamo anawae aurairive wamo anyube wepirati win dako?”

“Jewen tavon.”

²² Umba wo raura Yohanes ai ware, “Maisyare omaisyamo, taune nyo naura kakavimbe nande reansai indamu reamakata reamo raura vatano wo reansatutire mansai mamaisyo taune nyo naura rai.”

²³ Naije umba Yohanes payao nande mansai, po taune aura kakavimbe maisyare anawae Yesaya po aurairive rai no taiso:

“Risyrati vatano igwaimbe no nugo vabukane vono maninimbe syare,

‘Wapo unanuije ratayao da nsarokir indamu Amisyepanya rai.’”✧

²⁴ Naije vatano nanawirati vatano Parisije wo matutire ²⁵ wo Yohanes anajo akato ware, “Ranivara winyare winyamo Mesiasa pi winya jewen, muno Elia pi winya jewen tavon, muno anawae

† **1:19** Vatano mavaki susyo Lewi onawirati wanapatambe no Yavaro Amisyepanya rai. ✧ **1:23** Yesaya 40:3

aurairive pi winya jewen tenambe, mbeanimaibe nyo vatane maugasya kuvuni mana rai?”

²⁶ Yohanes payao akananto mansai pare, “Syo vatane maugasya kuvuni mana rai, weramu wasayai di wato Vatano wapantatukambe ai napi pe wana wato. ²⁷ Vatano napije indati po inar-ija de, muno Apa waijo nowo ajo kokome raije mammo syo rapaya kakai, weye risyamo imamaisy ramu.”

²⁸ Anakotare so nande tenambe no munijo Betania, mana akoe Yordan ama ranijo wanamuram, nai rati Yohanes po vatane maugasya kuvuni mana rai.

Yohanes de po wansarorono Yesus apa de rai

²⁹ Siman akato Yohanes perato po Yesus aeno dei. Naije po raura nanto vatano una no naije mansai pare, “Waperata, Amisye apa Domba Tuvan, Napi po ayao kakai mine so rapaya, de ratuije! ³⁰ Wepirati syo aura kakavimbe syare Po inarija de, weramu Opamo panakoe inakivan weye arono rino no mine so rainyamo Opamo no to. ³¹ Wusyinoe taune risyamo syantukambe Ai tavona, weramu soamo syo aen to. Muno sya ride ti syo vatane maugasya kuvuni mana rai omamo indamu syo Napiso arorono vatano Israel wasai indamu wapo aen kakavimbe.”

³² Naije Yohanes po Yesus aura kakavimbe no taiso: “Syo Anawayo Vambunin raen no naumo warae maje ntuna irati Ai, maisyare insanijo punamoe amaisy. ³³ Arono naije risyamo syo aen tavone ramu ti are pi so. Weramu arono Amisye po inatutir syo vatane maugasya kuvuni

mana rai, Po raura inai to pare, ‘Vatano rui pi nyo aen Anawayo Vambunin maje ntuna Ai, Vatano napije wepirati indati po Anawayo Vambunine ratutir maje vatano wanui mansai.’ ³⁴ Muno risyi Yohanes syerato syo aen to, weti syo raura kakavimbe: Opamo Arikainyo Amisy.”

Vatano utavondi Yesus ai manasyimbe

³⁵ Siman akato Yohanes muno apa arakovo itavondi ai yano jirum una no naije akato.

³⁶ Arono Yohanes po Yesus aen panya ti de to, naije po aura pare, “Syerato Amisye apa Domba Tuvane pi ratuije!”

³⁷ Yohanes apa arakovo javondi ai umaso yo apa ayao po raura so raraniva jewen, naije yurija javondi jirati Yesus ai. ³⁸ Yesus sakinav peravo akiri akare Po yaen javondi Ai. Weti Po yanajo pare, “Ipare?”

Umba yo raura akananto Ai yare, “Injayo Rabi, Winyamo soamo nori rui?” (Rabi ama ine mare Kurune ayao Yahudi rai.)

³⁹ Umba Yesus po raura yai pare, “Wiride rati indati taune ipo raen.” Weti javondi Ai wuruta, yo Apa norije raen. Arono naijeamo uma amije mambisy namandive, weti inya irati atavon ava ngkaumu kobe.

⁴⁰ Vatano yo Yohanes apa ayao raranive umaso weti javondi Yesus ai, inta apa tame mirati Andreas, opamo Simon Petrus apa rijata piye. ⁴¹ Naije Andreas pavave po apa anui Simon akani. Arono nanto ai, po raura pare, “Reananto irati Mesias ai to!” (Tamo Mesias mo tamo Kristus ramaisy, ama ayao mare, “Vatano Amisye po apatimu indamu

be akari titive wansai.”) ⁴² Andreas po Simon augav to no Yesusa nui.

Yesus ami ntamijo Simon ai, umba Po raura pare, “Winyirati Simon, Yona apa arikainye pi winy. Weramu nya tame syare Syo raura mamu Kepas.” (Tamo Kepas mo tamo Petrus ramaisy, ama ine mare “oramo mantantuman.”)

Yesus po Pilipusa pe Nataniera pe yawain

⁴³ Siman akato Yesus po raura patimuve pare, “Risyamo to no Galilea.” Umba to nanto irati Pilipus ai, naije Po raura nanto ai pare, “Nde ramu ntavono Rinai!” ⁴⁴ Pilipus opamo vatano Betsaida pa, maisyare omai tavon Andreaa pe Petrusa pe onayamo vatano Betsaida tavon. ⁴⁵ Pilipus nanto irati Nataniera ai, umba po raura nanto ai pare, “Reananto Vatano aurairive no ayao Musa po ratoe Ai muno anawae Amisy wo aurairive no wusyinoe Ai to. Wepirati Yesus, vatano Nasaret, Yusup apa arikainy.”

⁴⁶ Weramu Nataniera po raura nanto pare, “Wakoe! Vatano panakoe pamo no no Nasaret umba de rako?!”

Weti Pilipus pare, “Nde rati! Taune nyo aen dati.”

⁴⁷ Yesus po Nataniera aeno dei, naije Po aura pare, “Waperato! Vatano Israel kakui, wepi de wato. Angkarije meweno ai.”

⁴⁸ Umba Nataniera po ranajo nanto Yesus ai pare, “Injae, Nyo inaena rako?”

Yesus po raura akananto ai pare, “Arono Pilipus po nawain dainyamo, wintuna no inyo ara ama ruke rai, weramu risyeravore Syo naen to.”

⁴⁹ Umba Nataniera paparo ai ti po raura akananto Yesus ai pare, “Tugae! Injayo Kurune, Winyamo Arikainyo Amisy. Winyirati Akarijo Titi Israel pi Winy!”

⁵⁰ Yesus payao pare, “Winyanave somamo ta syeravore Syo naeno wusyimbe no inyo ara ama ruke wije! Weramu omamo anakotaro mamaun bayave. Anakotaro manakoeve mo we rakivan omamo indati nyo raen aje! ⁵¹ Syo raura tugaive: Indati wapo naumo warae raen nsaneka, muno naito Amisye usea waje ude Arikainyo Vatane rinai.”

2

Ono vaunam rave no munijo Kana

¹ Sisa masyoto mandeije rai, ono vaunam inta rave no munijo Kana no no propinsijo Galilea. Arono naije Yesus apa akoya ntavono one umaso rai. ² Muno Yesusa pe apa arakovo utavondi ai nawe mawainde utavono ono namije rai tavon. ³ Arono angguriye mewen, Yesus apa akoya mo raura nanto Yesus ai mare, “Umaso awa angguriye mewen to.”

⁴ Yesus po raura akananto akoya rai pare, “In-gko, vemo nyo inatutir nora. Weye Sya masyoto syo sya vambunine raroron mamai dainya nene.”

⁵ Weramu Apa akoya mo raura nanto vatano wanapatambe mansai mare, “Animaisye mirati Yesus po wasatutir wapo rave, weamo wabeta rai vayave.”

⁶ Umba vabiu inta ntuna no yavare umaso indamu mana ramenasya rajia veano vatane maneme rarondom mamaisyo Yahudi awa koane

rai. Vabiuge umaso rano kawije intabo. Vabiu intabo ama mana ramenasya rai ratoro literije rai ratusije intabo. ⁷ Naije Yesus po raura nanto vatano wanapatambe mansai pare, “Wapo mana rayatasyai irati vabiu umawe rai tutudi.” Umba wo mana rayatasyai rai tenambea ntatairi. ⁸ Umba Yesus po matutir akato pare, “Soamo wapo inta raugav indamu vatano be akarive one so rai po ramanam.” Ti wo inta raugaveta ai.

⁹ Arono po ramanam, mana umaso mamu nsiwara mbe anggurive to, muno taune tavon pamo pantukambe angguriyo so rauga di rui? (Weramu vatano wanapatambe nanawirati wo raugavo ai wo raen to.) Naije akariyo one umaso po anya pare baunam umaso awain. ¹⁰ Muno po raura nanto ai pare, “Wakoe! Wamo raembea nsiridi to mamu arono wamo one inta rave, angguriyo ama manavan ngko dave wemirati manasyin dave raunande vatane mai. Weti wo ramanam ava ware wonae udamanami to. Umba one mare mewen, weamo wamo angguriyo ama ateteo manavane kobe jeben omi raunanta akato. Weramu winyamo nya ndaugav rijabe so angguriyo manavan dave! Nyo raunande ti wandamanama ngko dave!”

¹¹ Anapaporainye so Yesus po raroron no munijo Kana no no propinsijo Galilea, wemirati Apa anapaporainyo manasyin dave. Yesus apa anapaporainye so Apa vambunino ntiti rave Po raroron, weti Apa arakovo utavondi ai wo raen wanave Ai.

¹² Umba Yesus poroto no munijo Kapernaum. Muno akoya me, Apa rijate nanawe, Apa arakovo utavondi aije nanawe, wanya tenambe uta no

Kapernaum. Muno masyote inta yai una no munijo namije rai.

*Yesus siso Yavaro Amisye rai no Yerusalem
(Matius 21:12-13; Markus 11:15-17; Lukas
19:45-46)*

¹³ Arono Ono Paska Yahudi mararai kobe, Yesus panya akato to no Yerusalem. ¹⁴ Nande no Yavaro Amisye rai, naije Po raen vatano wanui wanamavumbe no Yavaro Amisye ama usye rai. Inta wo sapije mansamavun, domba tavon muno inta wo insani maisyare insanijo punam mansamavun tavon. Muno vatano wo doi amijo kaijinta raugavere raveano doi amijo Yahudi ranigwane utantuna tavon no naije. ¹⁵ Yesus po ana umaso raen, naije kobe Po kaijo waije raokae nake rai inta ranari Po raveano mawatan bintabo, awa domba muno sapije mautan, ti unanajibe Yavaro Amisye raora tenambe. Meja uma vatane wo ratayao ti wo doi je ranigwane wemamo Yesus po rasasakinavo mansai, weti awa doi je mbuvarasyo no min pusyiki tatugadi. ¹⁶ Naije Yesus po raura nanto vatano wo insani mansamavune mansai pare, “Wapo wapa anakotare so raugav wapuje Yavaro Amisy raora vintabo! Sya Injaya apa Yavare mi so! Vemo wapo ranigwano yavaro anamayune obo inta rai nora!”

¹⁷ Naije Yesus apa arakovo utavondi ai maemen irati anawae Amisy apa ayao po ratoe so rai: “Inanuga ntento Injayo Amisy nya Yavare rai rave.

Omamo maisyare taname ntipu inanuga rai mo ranena mangkur.”✧

¹⁸ Umba vatano Yahudi wayao ensembe nanto Yesus ai ware, “Winya varore mi so ma jewena, indamu Nyo reansaveare somaisye ramu! Weti Nyo anapaporainye inta raroron inda reamo Nya vambunine raen dai!”

¹⁹ Yesus po raura akananto mansai pare, “Wapo Yavaro Amisye so randamisy, weramu masyote mandeij Risyo raugakaseo ntet.”

²⁰ Naije vatano Yahudi wo raura akananto Ai ware, “Tume tename jirum eane kaujentabo umba Yavaro Amisye so ranarija mewen. Weti winyare Nyo ranarija meweno masyote mandeija bo yai, mamaisye ramu.”

²¹ Weramu Yavaro Amisy uma Po raura somamo taune anasine mirati Po raurata rai. ²² Maisyare omai ti, arono Yesus kovakato no wene rai, Apa arakovo utavondi ai mansaemen akato Apa ana po raura umawe rai. Munu wanave irati Ayao Amisye munu Yesus apa ana po raura rai.

Yesus po vatan tenambe mansaena nto no manuga rai

²³ Yesus no no Yerusalem arono Ono Paska rave, naije vatano wanui rave wanave Ai weye po anapaporainye raroron. ²⁴ Weramu Yesus taune pamo panave mansai ramu, weye Opamo po vatane mansaen bintabo. ²⁵ Vatane inta po anakotaro no no vatane manuga raura kakavimbe nanto Yesus ai mamu jewen kai, weye taune Pamo po raen bintabo to.

3

Yesusa pe Nikodemusa pe yayao

¹ Vatano Parisije inta apa tame mirati Nikodemus, opamo akarijo vatano Yahudi inta piye.

² Namane inta de no Yesusa nui, naije payao nande Ai pare, “Injayo Kurune, reamo naen Winyamo Amisye po natutir, weye are pirati po anapaporainye inta raroronare Nyo rave ramaisy, Opamo Amisye tavondi ai piye.”

³ Yesus po raura akananto ai pare, “Syo raura tugaive: Vatane inta pare ato siso kawasaeyo Amisye be akarive maije mai, weamo ano akato wanyimbe, wea umba siso.”

⁴ Naije Nikodemus pare, “Vatano panakoe to umba ano wanyimbe tai rui? Indako pakato no akoya ranobone rai jakato umba avaki wanyimbe akato rako?”

⁵ Naije Yesus po raura akananto ai pare, “Syo raura tugaive: Vatane inta pare ato siso kawasaeyo Amisye be akarive maije mai, weamo avaki mana rai muno Anawayo Vambunine rai wusyimbe rati. ⁶ Vatane wansaeno wansanasino kopa so raijamo wama vatan anui nawirati wo wansavaki. Yara wama kovo wamo raeno wansamije rai jeweno wem omamo Anawayo Vambunin wemirati mo wansavaki rai. ⁷ Maisyare omai ti, arakovo Nikodemus, vemo mpaparo nai nora, arono Syo raura syare wea tenambe wasavaki jakato. ⁸ Ovare po nuge ramawisy no rui rui vayave. Anamuare bo wamo ranaun, weramu wamantukambe apa no rai ti de rai muno pare poroto ri rui. Weti Anawayo Vambunine mo vatane mavaki omamo maisyare ovare amaisy. Wamo Anawayo Vambunin raeno wansamije rai ramu, weramu tugae Mo kove

raugaje vatane mai mamaisyo Ama bekere bo rai.”

⁹ Naije Nikodemus po Yesus anajo pare, “Maisyare omai ti, anakotare somamo indati nandeara rui?”

¹⁰ Yesus po raura akananto ai pare, “Winyamo kuruno akoe no munijo Israel. Mbeanimaibe winanto anakotare so rai jeben? ¹¹ Syo raura tugaive: Ana reamo raene mirati reamo raura wasai muno ana reamo raeno reansamije rai wemirati reandaura kakavimbe wasai. Weramu weapanave raije ramu. ¹² Umawe Syo ana nande no mine so inta raura kakavimbe wasai to, weramu wapanave rai jeben. Wabeare so, Syo ana nande no munijo ntiti inta raura, weamo indati wapanave rai jeben kobe. ¹³ Vatane inta pana to no munijo ntiti rai rainy. Weramu Risyirati Arikainyo Vatan syo anakotaro munijo ntiti raen tenambe, weye ino no munijo ntiti syaje no mine so.

¹⁴ Maisyare wusyinoe Musa no no nugo vabukane vono maninimbe po tembaga ranari tawaive po ratuga seo inyo inta rai, maisyare muno omaisy Risy, Arikainyo Vatan, indati inaijaseo no inyo rai tavon, ¹⁵ indamu vatano are pirati panave Rinai, indati apaura irati kovo nuge nuganuije rai.”

¹⁶ Weye Amisy muiny irati vatan tenambe mansai no mine vone so wirati Po apa Kavon intabo dave aunande indamu vatano wanave Aije indati ukakai awa ayao kakai raije jeben, yara awaura irati kovo nuge nuganuije rai. ¹⁷ Weye Amisy po apa Kavon atutir de mine so rai indamu Po mangke

raugaje vatano mine so mai mamu jewena, yara indamu Po mapaya awa ayao kakaije rai.

¹⁸ Vatano wanave Amisye apa Kavo ai, indati mangke raugaje mansai jeben. Yara vatano wanave Ai jeben, awa mangke mamu Amisye po rapatimu mansai to weye wanave Apa Kavo intabo dave Aije ramu. ¹⁹ Amisye po rapatimu pare Po mangke raugaje mai weye Apa Vare nde mine so rai to, weramu vatane ubekero kaumure bo rai rave, weye awa ana udave ngkakai muno mamun. ²⁰ Vatano are pirati po ayao kakaije rave, opamo anuga mamuno Amisye apa Vare umaso rai. Ponae de Vare umaso rai indamu vemo apa ayao kakai erananta raen kakavimbe inya. ²¹ Weramu vatano po Amisye apa ayao tugae obo rarijat, weamo de Vare umaso rai indamu apa ana po rave raen kakavimbe omamo mamaisyo Amisye apa bekere rai.

Yohanes Pembaptis po Yesus aura kakavimbe

²² Arono naije Yesusa pe apa arakovo utavondi ai nawe wuruta no propinsijo Yudea. Yesus no no Yudea masyote kavinta yai muno Apa arakove matavon. Muno Po vatane maugasya kuvuni mana rai.

²³ Weramu Yohanes pamo po vatane maugasya kuvuni mana rai tavon no munijo Ainon mararai no Salim, weye mana manui rave no naije. Vatano wanui ude indamu Yohanes po maugasya kuvuni mana rai. ²⁴ Arono naije Yohanes pamo ausiso tanoano makova rai rainy.

²⁵ Yohanes apa arakovo utavondi ai nanawe, vatano Yahudi inta pe, wayaowi jirati koano vatane wo maneme, majoe rarondome rai.

²⁶ Wuruta no Yohanesa nui muno wo raura nanto ai ware, “Injayo Kurune, winyamo ta naemeno Vatano nandija po Injae natavon no mana Yordan we Aija e? Arono naije Injae nyo arorono reansai. Vatano napije soamo Po vatane maugasya kuvuni mana rai tavona, weti vatan tenambe uta irati Ai. Abo! Indati Po nakivan aje!”

²⁷ Yohanes po raura akananto mansai pare, “Anakotaro rui vayave vatane awaura rai mamu Amisyepi po raunande. ²⁸ Taune weadaniv syo raurawa wadanaun to syare, ‘Risyamo Mesias wepi risya jewena. Yara rinatutir syo usye raugavo Ai.’ ²⁹ Syo ananeneae inta raura wasai: Arono anya pare baunam, opirati po apa wanya raugav. Weramu apa arakov napirati po ono vaunam ratayao amarom, tet po anyuto dei. Muno opamo ananibe rave arono daniv anya baunam so de nande to. Maisyare omaisy risyamo inananibe rave weye syo ranaun Mesias de to, Wepirati syo vatane matayao indamu wanave Ai piye. ³⁰ Indati vatano utavondi Yesu ai awa wanui miridije neso, yara vatano utavondi rinai awa wanui makaje ti mamaun.”

Yesu no no munijo ntiti umba paje

³¹ Yesu opamo no vombe rave no warae umbade, weti Opamo titi vintabo vatane makivan. Vatano mine so nawamo awa munije me awa anakotaro uaura omamo mine so ama ma. Weramu Vatano no no munijo ntiti umba paje Opamo po vatan tenambe wansakivan. ³² Yesu taune po munijo ntiti raen muno taune Po Amisyepi apa ayaowe raranivo amarikoame rai. Weramu arono Po anakotare umaso raura kakavimbe,

vatane wanave raije ramu. ³³ Yara vatano rui pirati panave Apa ayao rai, weamo po raen Amisye pamo apa ayao mbe tugaive. ³⁴ Weye Yesus wepi Amisye po atutir weti Apa daura mammo Amisye apa bom, weye Anawayo Vambunin raugasyo Ai ti Mo ausuru tenambe.

³⁵ Injayo Amisy muiny irati Apa Arikainye ai, weti Po anakotaro rui vayave raunande Ai vintabo. ³⁶ Vatano are nawirati wanave Arikainyo Amisy napije ai, weamo awaura irati kovo nuge nuganuije rai. Yara vatano ponae beto irati Ai, weamo apaura kovo namije rai ramu, yara Amisye apa pari mangke Po raugaje aija nuge nuganui.

4

Yesusa pe wanya Samaria me yayao

¹ Vatano Parisi udaniv Yesus apa vatano po maugasya kuvuni mana rai muno utavondi Ai wanui rave Yohanes apa makivan. ² (Weramu Yesus taune po maugasya kuvuni mana rai ramu, yara Apa arakovo utavondi aije obo nao wo rave.)

³ Yesus po ana umaso ranaun, naije Po Yudea rapaya nara pakare no Galilea.

⁴ Apa unanui anya to no Galilea mammo siso no propinsijo Samaria wusyimbe rati. ⁵ Naije Yesus pui yava nanto munije inta rai no Samaria umaso rai, ama tame mirati Sikar. Munijo namije mararai mino aneno Yakob po raunande apa kavo Yusup ai no wusyinoe rai. ⁶ Mino namije mirati aneno Yakob apa mana ami po rawae norije. Yesus panyawa mayondi, weti nanto tuna no

mana ami umaso ama tuga rai. Arono naijeamo uma amije indati nanto no masyote yasyin.

7-8 Yesus tuna no naije, weramu Apa arakovo utavondi ai nanawamo wuruta wo anaisye ramavun no munijo mararai namije rai. Umba wanya Samaria inta nde mo mana rawavin. Umba Yesus po ranajo pare, “Syare nyo mana inta raunande Syo ramanam.”

9 Naije wanya Samaria umaso mayao akanande Yesus ai mare, “Injae, Winyamo vatano Yahudi muno risyamo vatano Samaria. Umba mbeanimaibe Nyo inanajo mana rai?” (Weye vatano Yahudi nanawamo wayao nande vatano Samaria mansai ramu.)

10 Umba Yesus po mana umaso raura ananeaebe akananto wanya umaso rai pare, “Syo mana ranajo nai, weramu ranivara winyo Amisye apa kovo pare Po raunande naije raen datire, muno winyo rinaen kakavimbe ratire, indati winyirati nyo mana ranajo Rinai muno indati Syo mana mo kove raugaje raunandeo nai.”

11 Wanya namije mo raura akanande Yesus ai mare, “Injae, Winya kapijo mana rayate meweno Naija, muno mana somamo masyo ravea. Weti mana uma mo kove raunande weti ndaura wato mamu Nyo rawavin no rui? 12 Wusyinoe reama aneno Yakob po mana ami po rawae so raunande apa ajavi reansai. Taune po mana ramaname rauga di so muno apa arikainye nao tavon muno apa maero po makume nao tavon. Injae, mbeanimaibe Winyo rakaraeya nyare Winyirati nyanakoe Nyo reama aneno Yakob akivan?”

¹³ Yesus po ananeneae inta raura nanto rai jakato pare, “Vatano wo mana wato ramanam indati mansawa ngkangkamandi akato. ¹⁴ Yara vatano wo mana namirati Syo raunande ramanam, indati mawa ngkangkamandi akatoe ramuga nuge nuganui. Weye mana namirati indati Syo raunande namije maisyare mana amijo njai tutir kobe no vatane anuga raija nuge nuganui.”

¹⁵ Naije wanya umaso mayao akananto Ai mare, “Injae, syare Nyo mana ndaurawe inta raude syo ramanam, indamu inawa ngkangkamandive akato jeben muno indamu vemo syakare syo mana raugabe akato no so inya.”

¹⁶ Umba Yesus pare, “Nyakato nyo nya anya awain umba ipakare no so.”

¹⁷ Umba wanya umaso mo raura akananto Yesus ai mare, “Risyamo sya ana waino anya inta ai ramu.”

Umba Yesus po raura akananto rai pare, “Nya ana nyo raura wato mo ramai dave. ¹⁸ Weye winyamo nyo anya radani maovan to, muno anya soamo pe wirinakava opamo nya ana pije pa jewena. Nya ayao umaso mammo mo ramai dave.”

¹⁹ Umba wanya umaso mare, “Injae, soamo syo naen Winyamo anawae Amisye inta pi Winy. ²⁰ Kawasae Samaria reamamo reama aneno wusyine ubeaje Amisye ai ri rati pukame naiso. Weramu, Injae, Nya kawasae Yahudi weapamo wapo raura wapare Yerusalem obo mirati vatane ubeaje Amisye ai.”

²¹ Umba Yesus po raura rai pare, “Ingkoe, syare nyanave Sya ana syo raura so rai: Indati masyote

nde nande arono vatane ubeaje Amisye ai, weramu indati unate so ma jewen, Yerusalem tavona jewen. ²² Vatano Samaria weap, wabeaje napirati wapo aene jeweno we ai. Yara vatano Yahudi reamamo reambeaje Napirati reamo aeno we Ai. Weye Vatano po vatane mapaya awa ayao kakaije rai pamo Yahudije pa. ²³ Masyote nggwaravainy akatoe ramu, yara soamo nde to arono Anawayo Vambunine mo vambunine raugaje vatane mansai inda ubeaje Injayo Amisye aijo tugaive, weye wenawirati ubeaje Ai mamaisyo apa bekere rai. ²⁴ Amisye pamo anawayoe pa; anasine meweno Ai. Maisyare omai ti, vatane ware ubeaje Amisye ai inda mamaisy, weamo Anawayo Vambunine mo vambunine raugaje rati muno ubeaje Aijo tugaive manuga ntenami rautan.”

²⁵ Wanya namije mo raura mare, “Syo raen Mesias, Opi awainamo Kristus, indati pare de. Ranivara de to, naije Po anakotare raura kakavimbe wansai tenambe.”

²⁶ Yesus po raura kakavimbe pare, “Risyi syayao nande nai Risiamo Mesias opi Risy.”

²⁷ Arono naije Yesus apa arakovo utavondi ai wakare. Upaparo mansai weye Yesusa pe wanya inta me yayao. Wo ratantona ware ana rui wanya so mo Yesus anajo rai? Muno veanimaibe Po raura nande rai? Weramu arakove inta bambunin da po anajo ramu.

²⁸ Uмба wanya umaso mo ama vabiu umawe rapaya ti ntami, yara nin ti makato mo raura vatano una no munijo nanawije mansai mare, ²⁹ “Syare wade ra wapo Vatano napi po risya

anakotaro syo raveve no wusyinoe raura kakavimbe nande rinai tenambeye aen dati! Risyo akarae syare indako vatane sopamo Mesias* wepi so dako?” ³⁰ Umba vatano nanawije wuje awa munije so rai muno wuruta no Yesusa nui.

³¹ Arono naije Yesus apa arakovo utavondi ai wo anajo indamu pisyisy, ware, “Injayo Kurune, Nyo anaisyey raisy!”

³² Weramu Yesus po ananeneae raura akananto mansai pare, “Anaisyey inta mi no Rinai, weramu wepamo wapantatukambe rai.”

³³ Naije Apa arakove umaso taune wo taune mansanajo vambinibe ware, “Vatane inta wo anaisyey inta raugavo amaroma rako?”

³⁴ Umba Yesus po raura akananto mansai pare, “Sya anaisyey raurata irati itavondi Amisyoy po inatutire Apa bekere rai, muno Syo Apa anakero po raugaje Inai raija damu mewen. ³⁵ Weapa ana wadaura inta mamoy wapare embae mam-bisyamo wapa anaisyoy wapo rayanyume matu to, umba wapo ama ine ranugan. Weramu Risya syo raura nande wasai mamoy syare waperata: nawaisyey matu to, weti soamo anatatayaube ranugane rai! Anare idaura mamoy vatano wanui wato, nanawirati wanatatayaube manuga rai indamu wanave Rinai. ³⁶ Weti vatano wo ama ine ranugan onawamo Amisyey pi po mavae. Muno awa ino wo ranugane mamoy vatano ude wanave ti ukova nuge nuganui. Indati vatano wo anare kami rangkiki muno vatano wo ama ine ranugan,

* **4:29** Tamo Mesias mo tamo Kristus ramaisy, ama ayao mare, “Vatano Amisyey po apatimu indamu be akari titive wansai.”

wenanao tenambe mananibe kava. ³⁷ Weti ayao varije somamo tugae rave: ‘Inta wo anare kamije rangkiki muno kaijinta wo ama ine raugav.’ ³⁸ Syo wasatutir wata wapo nawaisy ama ine raugav. Taune wapo nawaisyo namije rajare jewen, yara vatano kaije wo rayare muno wo anare rayanyun dai to. Yara syare weapamo wata wapo ama ine raugav ngkovo wasai. Tugae, vatano kaijinta wo ayao Amisyey rayanyumo vatane wato manuga rai to, weramu weapamo indati wapo ama ine raen arono unande wanave irati Rinai.”

³⁹ Vatano Samaria una no munijo namije wanui wanave Yesus ai weye wanya umawe mo raura mansai mare, “Yesus po sya anakotaro syo raeve no wusyinoe ratodi rinai tenambe.” ⁴⁰ Maisyare omai ti, vatano Samaria umaso unande Yesus ai, wo amavu indamu pe una. Weti Wepe una no naije masyote rorum. ⁴¹ Muno vatano wanui rave wanave weye Yesus taune po manyao. ⁴² Vatano wanui nanawije wo raura nanto wanya umawe rai ware, “Arono wusyin reamo winya ana nyo Yesus aura obo ranaun. Weramu naisoamo taune Po raura nande reansai reandaraniv muno reamanave rai: Yesus so tugaeyamo Akarijo po vatano mine so mapaya awa ayao kakaije rai pije.”

Yesus po saumane raunanto arikainyo gwanen inta ai no munijo Kapernaum

(Matius 8:5-13; Lukas 7:1-10)

⁴³ Yesus no no munijo Sikar masyote rorum, naije akato poroto no Galilea. ⁴⁴ Apa ayao po raura we no taiso: “Anawae Amisyey to no munijo maran, weamo vatane wanave ai. Yara pakato no taune apa munije rajamo vatane wo aranive

ramu.”☆ 45 Arono Yesus siso no Galilea, vatano Galilea manayanambe ti wo augave siso, weye arono Ono Paska umawe una no Yerusalem muno Yesus apa anapaporainyo po raroron no naije mamu wo raen tenambe to.

46 Naije akato Yesus pakare no munijo Kana no Galilea, wemirati munijo wusyinoe Po mana ravea mbe anggurive. Munijo namije vatano po anakere raijar no pemerinta inta no naije, apa arikainye pamo gwanen no munijo Kapernaum.

47 Vatano pemerinta umaso daniv Yesus no no Yudea de nande Galilea rai to, weti poroto no Yesusa nui. Umba po anajo indamu poroto no apa munijo Kapernaum indamu Po saumane raugaje apa kavo napirati gwanena pare pararai kakai kobe ai.

48 Yesus po raura nanto vatano pemerinta umaso ai pare, “Kawasae weapamo Syo wasaen damu wapa anave mamai dainy! Wapare wapo anapaporainye raeno wasamije rai, wea umba wapanave. Weramu Syo wasaen wapanave Rinai tugaive rainy.”

49 Vatane umaso payao akato pare, “Injae, winde paep, sya arikainye kakai rainye so.”

50 Naije Yesus po raura akananto vatane umaso ai pare, “Nyoronto kai, nya arikainye sauman to.”

Vatane umaso panave Yesus apa ayao po raura so rai, weti poroto kobe. 51 Pui yava unanuije ama yasyin, naije apa vatano wanapatambe aije ude nande ai. Umba wo raura ai ware, “Injae, nya arikainye sauman to!”

☆ 4:44 Matius 13:57; Markus 6:4; Lukas 4:24

⁵² Naije po manajo pare, “Weti uma ami ruimai dave sauman?”

Umba wo raura ware, “Namanawe uma ami intabo masyote yasyin, arikainye anakea mamokane raumandi ai.”

⁵³ Naije ajae napiso aemendi pare, “Syo raenamo uma ami wapo raura wato tavon, Yesus po raura nande pare, ‘Nya arikainye sauman to.’ ” Weti ajae umaso muno apa yavaruga tenambe wanave Yesus ai.

⁵⁴ Anapaporainye umaso mamo anapaporainyo jirum Yesus po raroron no Galilea arono puje no Yudea umba de no Galilea.

5

Yesus po saumane raugaje vatano gwanen inta ai arono masyoto sambaya rai

¹ Naije akato ono akoe Yahudi inta ama masyote mamaisy, weti Yesus poroto no Yerusalem. ² No Yerusalem, mararai no Unsanda Domba rai, waro kampo inta ntuna no naije, ama tame raura ayao Yahudi raijamo Betesda. Muno ama repone radani no ama tuga rai. ³ Repone radani umaso vatano ugwanen wanui rave unaki rai: inta nawirati mamije ntuba, muno inta nawirati majo mayondi muno tunaive. Vatane umaso una mana umaso ranyuto ama mansumu rai. ⁴ Weye intanamo naito Amisy inta paje pasyo waro umaso rai, weamo mansumu. Muno vatano ugwanen rui pi pasyo wusyimbe mana umaso rai arono mansumu, weamo apa wanene nsauman. Weti apa wanene kotaro rui vayave, nsauman kobe.

⁵ No ratuije vatane inta pamo gwanembevea tume tenamara eane abusyìn eane kaumandei.

⁶ Yesus perato po vatane umaso aen opamo apa wanene nggwaravain dave to. Naije Yesus po anajo aje pare, “Mbekero nsaumane raija rako?”

⁷ Vatano gwanene umaso po raura akananto Ai pare, “Injae, arono mana mansumu, ibeker vatane inta po inaijaseo po inaugasya mana rai, weramu vatane inta po inaugave ramu. Arono syare taune syoroto syasyo mana rai, weamo vatano kaijinta pavave pasyo wusyimbe to, ti imaisye ramu.”

⁸ Naije Yesus payao aje ai pare, “Mbeseo! Muno nya tanije rakapan indamu nyanya!”

⁹ Kavuratawe vatane umaso saumano anawadive kobe. Po apa tanije rakapan po raugav muno panya kobe.

Anapaporainye so Yesus po rave no Yahudi awa masyoto sambaya rai. ¹⁰ Maisyare omai ti, akarijo Yahudi wayao nanto vatano uma saumane so ai, wo raura ware, “Unumeso mamó masyoto sambaya mije, weti wama ananyao mare vemo nyo nya tanije rakapan ndauga nora!”

¹¹ Weramu vatano napije po raura akananto mansai pare, “Vatano po saumane raugaje inai Wepi po inatutir pare syo sya tanije raijaseo inda syo raugav syanya.”

¹² Weti wo anajo akato ware, “Are pirati po natutir nyo nya tanije raijaseo muno nyanya?”

¹³ Weramu vatano uma saumane wep pantatukambe Vatano are piye, weye aumandi vayave no vatano wanui nanawije awa yasyine rai.

¹⁴ Naije akato Yesus pakananto irati vatano uma saumane so ai no Yavaro Amisye ama uga rai, muno payao nanto ai pare, “Soamo winsauman to. Vemo nyo ayao kakaije rave akato nora indamu vemo nanto siurijo manakoe rai jakato nora.”

¹⁵ Umba vatane umaso poroto po raura akarijo Yahudi mansai pare, “Yesus wepirati po saumane raugaje rinai.”

¹⁶ Maisyare omai ti, akarijo Yahudi manuga ngkakaijo Yesus ai ti ubeker wo ave tatugadi, weye ware Po awa ananyao rakanyoandi arono Po saumane raugaje vatane mai no masyoto sambaya rai.

¹⁷ Weramu Yesus po raura nanto mansai pare, “Sya Injaya po apa anakere raijar tutira unumeso. Muno ri tavon Syo Apa anakere raijar tutir.”

¹⁸ Yesus apa ayao so mo akarijo Yahudi maveti upari rave ti wo unanui rakani indamu wo Yesus aubaisy. Upari weye Yesus po Yahudi awa ananyao rakanyoandi, namirati mare vemo anakere raija no masyoto sambaya rai nora. Weramu obo rai jeben, yara upari weye Yesus po taune aura pare Amisye opamo taune Apa Aja pije, ama ayao mare Yesus opamo po Amisye amai tavon.

Yesus apa vambunine

¹⁹ Yesus po raura nanto vatano Yahudi nanawije mansai pare, “Syo raura tugaive: Risyi Arikainyo Amisy syo anakere inta raijaro taune Sya vambunine raije ramu. Risyamo syo Injaya apa ana daijare raen muno Sya ana idaijare ma ntavondi Injaya apa rai. Weye animaisye mirati Injaya

po raijar omirati Apa Arikainye risy syo raijar. ²⁰ Weye Injaya muiny irati Apa Arikainye rinai, weti Po apa anakere raroron irati Rinai tenambe. Tugae, masyoto rijat indati Injayo Amisy po apa anakero manakoe rave inta rarorono Rinai jakato ti mo Sya anapaporainye umawe rakivan, weti wapo raen wapaparo wasai. ²¹ Injayo Amisy pamo po vatano nanawirati ugwenen to maijasea ukovakato muno Po kovo nuge nuganui raunanto irati mai. Maisyare omai tavon, Apa Arikainye risy syo kovo namije raunanto irati vatane mansai tavon, mamaisyo Sya bekere rai.

²² Injaya po mangke raugaje vatane mai vayave ramu, yara mangke rapatimu mamu Po raugaje no Apa Arikainye rinai indamu Syo raijar. ²³ Wirati indamu vatane ubeaje irati Apa Arikainye rinai maisyare muno ubeaje Injaya ai wemaisy. Weramu vatano ubeaje Arikainyo Amisy ai jeben, weamo ubeaje Injayo wepi po Apa Arikainye rinatutire Ai tavone ramu.

²⁴ Sya raura tugaive: Vatano po Sya ayao so ranaun ti beto rai muno panave irati Amisy po inatutire Ai, apaura kovo nuge nuganuije rai. Opamo indati mangke raugaje ai ramu, yara paya wene rai to muno siso irati kove rai. ²⁵ Sya raura tugaive: Masyote nggwaravainy akatoe ramu yara soamo nde to arono vatano ukakai to wo Arikainyo Amisy rinanamote ranaun kakavimbe. Wea umba vatano wo inaraniv ti utavondi Rinai nanao awaura kove rai. ²⁶ Weye Injaya pamo kovo nuge nuganui ama ruke pije, muno Po raugaje Apa Arikainye rinai, weti Apa Arikainye risyamo kove ama ruke pi Ri tavon. ²⁷ Mangke

rapatimu mamu Po raugaje Rinai indamu Syo raijar weye Risyirati Arikainyo Vatan. ²⁸ Vemo wapaparo wasai anakotaro raura so rai jinya! Weye ama masyote mamu indati nde nande arono vatano wene nde mansai to nanawamu wo inanamote ranaun. ²⁹ Naije umbu wuje no awa aipapo rai. Vatano awa ana udave ngkov indati ukovakato no wene rai muno awaura kovo nuge nuganuije rai. Yara vatano awa ana wo rave ngkakai muno mamun, ukovakato no wene rai wea umbu mangke raugaje mansai.”

Ayao mo Yesu aura kakavimbe

³⁰ Yesu po raura iridi pare, “Risyamu syo ana inta raijaro taune Sya bekere raije ramu. Risyamu syo mangke rapatimu mamaisyu Injaya apa ayao mo inatutiro raije bo rai. Muno Syo rapatimu mamu mamaisy weye itavondi taune Sya bekere raije ramu, yara Amisyu po inatutire Apa bekere rai.

³¹ Ranivara taune Syo taune inaura kakavimbe, weamu indati vatane wanave Inai jeven kai.

³² Yara Sya Injaya pirati po inaura kakavimbe vatane mansai muno Syo raen Apa ana daura namije mamu tugae.

³³ Weapo vatane inta matutir ude Yohanes Pembaptis ai muno apa ayao po inaura kakavimbe omamu mamai dave. ³⁴ Weramu Yohanesa dako, vatano kaijinta nao rako,

ukangkamambe Rinai mi syo rakanija jewena. Syo Yohanes apa ana daura umaso raura indamu wapo ranaun muno wapanave Rinai ti Amisyu po wasapaya wapa ayao kakaije rai.

³⁵ Yohanes opamu amaisyare yawainyo rakaindi

ramaisy, weye apa ayao mbaro wasanuga rai ti wasananibe rave masyote kavinta yai.

³⁶ Weramu Sya ana idajjare mo inaura kakavimbe tavon, mo Yohanes apa ayao umawe raki-van. Weye anakero Injayo Amisy po rau-gaje Rinai indamu syo rajjar wemi mo inaura kakavimbe Risyamo Injayo Amisy po inatutir. ³⁷ Muno Injayo Amisy wepi po inatutire taune Po inaura kakavimbe tavon. Weapamo wapo Amisy anamote rarani dainy muno wapo anakea raen dainy tavon. ³⁸ Muno wapo Apa ayao rau-gave nsiso wasanuga raije ramu. Weye Risyirati Amisy po inatutir, weramu wapanave Rinaije ramu. ³⁹ Weapo Ayao Amisy ranyao mavabe weye weapo rakarae omi mo wasauga ti wasisa irati kovo nuge nuganuije rai. Weramu Syo raura wasai: Ayao Amisy namije mammo Risyirati mo inaura kakavimbe! ⁴⁰ Weramu waponae wade Rinai indamu wapaura kovo nuge nuganuije rajji.

⁴¹ Risyamo vatane ukangkamambe Rinai mi syo rakanija jewena. ⁴² Risyo wasaen dave: Syo wasanuga raen weamuinyo Amisy aije ramu. ⁴³ Ride so, ride Injaya apa vambunine rautan, weramu wasanuga raneka wapo inaugave ramu. Yara ranivara vatano kaije wo raura ware ude taune awa vambunine rai, wapare wasanuga raneka wapo mansaugav. ⁴⁴ Wapare wapanave Amisy intabo obo ai, weramu wapo asyaniv kobe jewen, yara vatan bayave nawirati wapo masyaniv. Weye wabeke da Amisy anayanambe wasai ti Po wasararimbe wemamo waponae dai, yara wapo rave mammo wasanayanambe vatane

wo wasararimbe. Wabeare so, weamo wade wapanave Rinai jewen kobe.

⁴⁵⁻⁴⁶ Wapare Musa pamo vatano weasanave amen. Weramu Syo wasaen wapa anave ai maisyere ramu. Weye ranivara weapanave Musa ai ratire, weamo indati wapanave Rinai tavona. Weye Risyirati Musa po inaura kakavimbe no apa ana po ratoe rai. Maisyare omai ti, arono munije ama akari, Risyamo syanaikebe wasai no Injayo Amisy amune raije ramu, yara Musa wepirati panaikebe wasai weye weaponae wapanave Rinaiji. ⁴⁷ Tugae, wapanave Musa apa ayao po inaura rai ramu. Maisyare omaisy umba wapanave Sya ayao syo raura rai tavone ramu.”

6

Yesus po anaisye raunanto vatane ribuge radani wo raisy

(Matius 14:13-21; Markus 6:32-44; Lukas 9:10-17)

¹ Masyote inta yai jakato, Yesus poroto po onae Galilea raotar to no ama ranijo warani. Onae namije ama tamo kaije mirati Tiberias. ² Vatano wanui rave utavondi Ai weye wo Apa anapapoinyere raen arono Po saumane raunanto vatano ugwanene mansai to. ³ Yesus seo no unat muno Apa arakovo utavondi aije usea no unato naije tavon muno utantuna. ⁴ Arono naije vatano Yahudi awa Ono Paska ndea mangkepan to.

⁵ Yesus perato po vatano wanugande Ai mansaen wanui rave. Weti Po raura nanto Pilipus ai pare, “Pilipus, rui rati wamo anaisye inta ramavun indamu vatano wanui rave so wo

raisy?” ⁶ Yesus po anajo indamu Po anuga raen: apa anave mbambunin dako? Weramu Yesus apa ana indati po rave mamu taune Po raen to.

⁷ Pilipus po raura akananto Yesus ai pare, “Wakoe! Rotije mamu wamu doiyo manui rave veano ramavun, weramu indati mo vatano wanui rave so mansamai tavone ramu. Wo rakisyi rave kai weramu mamai tavone ramu!”*

⁸ Naije Yesus apa arakovo utavondi ai umaso inta apa tame mi Andreas, opamo Simon Petrus apa rijata pije. Andreas umaso po raura akananto Yesus ai pare, ⁹ “Arikainye inta pi apave rotije vasyesye radani yai muno apa jiane yano jirum tavon. Weramu anaisyu maisyare wato maisya indati yo vatano wanui rave so mansamaisy aje ye?”

¹⁰ Yesus po raura pare, “Wapo vatane so matuti da waje utantuna.” Mino namije mamu insumai ntuna rai manakoe, weti vatano wanui rave umaso waje utantuna rai. Muno awa wanuije mamu anya vatan anui bo matora nseo no ribuge radani. ¹¹ Naije Yesus po rotije umaso raugav Po kove raura seo Amisyu ai, umba Po ratodijo vatano wanui utantuna umaso mansai muno jiane ratodi tavon mamaisy irati awa bekere rai.

¹² Arono wisyisya uman to, Yesus po apa arakove matutir pare, “Wapo anaisyu ama ateteo ntantuna ranunugande indamu vemu inta raepata inya.” ¹³ Weti rotije radani ama atete wo

* **6:7** Ayao Yunani naiso mo raura mare, “doiyo nanto no 200 dinar mamu mamaisyu ramu.” Roma awa doiyo peraki rawainamo dinar.

ranugan akare umaso mamu bayaije abusyinara eane jirum ntatairi.

¹⁴ Arono vatane wo Apa anapaporainyo po raro-rone so raen, wo raura ware, “Sopamo tugae rave anawae Amisye po aurairive indati de mine so rai.” ¹⁵ Yesu po vatano wanui umaso mansaen ubeker ware ude wo antitidi indamu be akari titive. Maisyare omai ti, pusyo ti to no mumuimbe no unat.

Yesu panya onae vone rai

(Matius 14:22-33; Markus 6:45-52)

¹⁶ Munu arono masyote mare ngkaumu kobe, Yesu apa arakove wakata no onae. ¹⁷ Umba usea nyomane rai ware wo onae raotar uta no munijo Kapernaum. Arono masyote ngkaumu dave to, Yesu pakare Apa arakove mansai rainy. ¹⁸ Naije onae mamu ovare panyoan dave weti aneae makokoe. ¹⁹ Arono uborae yava ama waravainye mamu rakarae maisyare kilometerije radani rako kaujentabo rako, werata wo Yesu aen panya onae vone raide pangkepan no awa nyomane rai, weti ujani bintabo. ²⁰ Weramu Yesu po raura nantu mansai pare, “Risyi so! Vemo wajaniv inya!” ²¹ Weti onawamo mananibe, wo augave seo no nyoman. Munu naije kobe tavon nyomane nto nantu no nayave ruko nyomane mare nsiso raije rai to.

Vatano wanui wo Yesu akani

²² Siman akato vatano wanui nanawirati una tawan no onae ama tuga umawe rai wo raura ware, “Namanawe nyomane intabo dave no so. Wandaen Yesu opamo seo nyomane umawe raije ramu, yara Apa arakove obo nawirati usea rai,

wuruta to.” ²³⁻²⁴ Vatano wanui rave umaso wo Yesus muno Apa arakove mansaumandi, weti ware wo Yesus akani. Arono naije nyomane inta no no munijo Tiberias nde nande, wo rakarimu mararai no anoko Amisy Yesus po kove raura seo Amisy ai umba vatano wanui wo anaisyo rotije raisy. Maisyare omai ti, vatano wanui umaso usea nyomano uma nde so rai janyi, ware wo onae raotar indamu wo Yesus akani no munijo Kapernaum.

Anaisyo mo kovo nuge nuganuije raunande

²⁵ Arono vatano wanui umaso unanta Yesus ai no Kapernaum no onae tuga ranijo warani, wo anajo ware, “Injajo Kurune, nandui rati winde no naiso?”

²⁶ Yesus po raura akananto mansai pare, “Syo wasanuga raen kakavimbe: weapo inakani weye namanawe wapo rotije raisya waman dave. Weramu Sya anapaporainyo syo rarorone mamu weananta ama ine raije ramu. ²⁷ Vemo wapo anaisye obo rakani nora, weye indati anaisye wato mbaug ti meweno wasai jakato. Yara syare wapo anaisyo Risy Arikainyo Vatan syo raunande wasaije rakani ti wadaisy, weye anaisye so mbaug ramu. Wapo raisy weamo wakova nuge nuganui. Injajo Amisy po apa vambunine raugaje Rinai indamu syo anaisye so raunande wasai.”

²⁸ Umba vatano wanui umaso wo ranajo ware, “Animaisy mirati reamo rave indamu reantavondi Amisy apa bekere rai?”

²⁹ Yesus po raura akananto mansai pare, “Amisy apa bekere mi som: wapanave irati

Rinai weye risyirati Vatano Amisye po inautitir weti ide to.”

³⁰ Naije wo anajo akato ware, “Anapaporainyo rui mirati nyare Nyo raroron indamu reamo raen muno reamanave Nai? Animaisye mirati nyare Nyo rave? ³¹ Wusyinoe Musa po anapaporainye inta raroron arono po anaisyo manna raunande wama anene wo raisy no nugo vabukane vono maninimbe. Omamo Ayao Amisye mo ratoe mare, ‘Po anaisyo rotije no no munijo ntiti raugaje mansai.’[☆]”

³² Yesus po raura mansai pare, “Syo raura tugaiwe: Sya Injaya pi po anaisyo tugae no no munijo ntiti raugaje wasai, yara Musa po raugaje jewen.

³³ Weye anaisyo Amisye po raunande wemirati no no munijo ntiti maje indamu mo kove raugavere vatano mine so mansai.”

³⁴ Umba vatano wanui umaso wo raura ware, “Injae, Nyo anaisye uma wato raugaje reansai tutir!”

³⁵ Yesus po raura kakavimbe mansai pare, “Risyirati anaisyo mo kovo nuge nuganui raunande wepi Risy. Are pirati de Rinai, weamo maror akatoe ramu. Muno are pirati panave Rinai, weamo awa ngkangkamandi akatoe ramu.

³⁶ Weramu Syo raura akaore wasai: Wapo inaeno wasamije rai to, weramu wapanave Inai ramu.

³⁷ Are pirati Injayo Amisye po aunande Rinai, opamo indati de Rinai jaje. Muno are pirati de Rinai, opamo Risy amaута ramu. ³⁸ Weye Risyamo ino no munijo ntiti umba ide to indamu Syo taune sya bekere rajare ramu, yara Injayo po inatutire

☆ **6:31** Keluaran 16:4; Mazmur 78:24

Apa bekere mi Syo raijar. ³⁹ Muno Injayo po inatutire Apa bekere mi so: vatano Po maunande indamu utavondi Rinai, vemo inta aumandi nora, yara Syo maijasea ukovakato vintabo no munije ama akari. ⁴⁰ Weye Injayo Amisye apa bekere mi so: are pirati po Risy, Arikainyo Amisy, rinaen no anuga rai muno panave irati Rinai, wepamo apave irati kovo nuge nuganuije rai, muno Risyo aijaseo kovakato no munije ama akari.”

⁴¹ Vatano Yahudi uparijo Yesus ai weye Po taune aura pare, “Risyrati anaisyo no no munijo ntiti umba ide.” ⁴² Wo raura ware, “Yesus wepi so dako? Yusup apa kavo pije! Apa ajaya pe akoya me onayamo wamo yaena! Umba veanimaiibe irati taune Po raura pare, ‘Risiamo ino no munijo ntiti ide to’?”

⁴³ Yesus po raura akananto mansai pare, “Vemo wapayao ensembe nora. ⁴⁴ Vatane nawamo inta de Rinai tatuga bayave ramu, yara vatano rui pirati Injayo po inatutire pare po augave sen, wepi de Rinai. Vatano napije indati Syo aijaseo kovakato no munije ama akari. ⁴⁵ Anawae wusyine inta po raurairive ti ratoe apa bukuge rai pare, ‘Vatan tenambe nawamo indati Amisye po manyao.’[☆] Maisyare omai ti, are nawirati wo Amisye apa ayao raraniv muno wo raugave nsiso manuga rai, weamo ude Rinai. ⁴⁶ Vatan inta po Injayo Amisye aeno amije raije jewen bayave yara Ribuisy, weye rino no Amisye ai umba ide, weti Risyo Injayo Amisye aeno inamije rai to. ⁴⁷ Syo raura tugaive: are pirati panave, apave irati kovo noa nuge nuganuije rai.

[☆] **6:45** Yesaya 54:13

⁴⁸ Risyrati anaisyo mo kovo nuge nuganui raunande wepi Risy. ⁴⁹ Wapa anene wo anaisyo manna raisy no nugo vabukane vono maninimbe weramu wenawamo ugwenen to. ⁵⁰ Weramu are pirati po anaisyo no no munijo ntiti ti maje so raisy opamo wene nande ai jakatoe ramu. ⁵¹ Risyrati anaisyo mo kove raunande wepi Risy, ino no munijo ntiti syaje to. Ranivara vatane inta po anaisyo namiso raisy, opamo kova nuge nuganui. Muno anaisyo Syo raunande so omamo inanasine mije, wemirati Syo raunande indamu vatano mine so ukovo rai.”

⁵² Weti vatano Yahudi wayao ensembe mansai vambinibe ware, “Po raura pare Po anasine raunande wamo raisy, omamo no tai ruimaisy?”

⁵³ Weti Yesus po raura akananto mansai pare, “Syo raura tugaive: ranivara weapo Arikainyo Vatan sya ine raisye jewen muno Sya mavu ramanam tavone jewen, weamo wapave kovo nuge nuganuije raije ramu. ⁵⁴ Are pirati po Sya ine raisy muno po Sya mavuge ramanam, weamo apave kovo nuge nuganuije rai muno Risyo ajaseo kovakato no munije ama akari. ⁵⁵ Weye Risya ine mamu tugae rave anaisye ma muno Sya mavuge mamu tugae rave mana ramaname ma. ⁵⁶ Vatan are pirati po inanasine raisy muno po Sya mavuge ramanam, weamo be intabove Rinai muno Risyamo ibe intabove tawan irati ai tavon.

⁵⁷ Injayo wepi po inatutire Opamo kova no tawan, muno Risyamo rikova no tawan tavon weye Po kove raunande Rinai. Maisyare omaisyamo vatano are pirati po inaisy, opamo kova no tawan weye Syo kove raunande ai.

⁵⁸ Somirati anaisyo no no munijo ntiti nde mo anaisyo wusyino anene wo raisye ramaisye ramu. Weye anene ugwenen to, weramu are pirati po anaisyo namiso raisy, opamo indati kova nuge nuganui.”

⁵⁹ Anakotare so ntenambe Yesus po raura no munijo Kapernaum arono Po ananyao raugav no yavaro sambaya ama uga rai.

Yesus apa arakove inta wonae Ai ti waunsu akirive Ai no Galilea

⁶⁰ Arono Yesus apa arakove wo apa ayao ranauna mewen, arakove umaso wanui wo raura ware, “Yesus apa ayao so mpanyoan dave. Are pirati bambunin po raranibe?”

⁶¹ Yesus po apa arakove manuga raen wo Apa ananyao raura udantutibe, weti Po raura nanto mansai pare, “Wabeanimaibe wapare Sya ananyao mpanyoan? Mo wapa anave rantau-nasyo ravea e? ⁶² Indati animaisye mi wapo rakarae arono wapo Arikainyo Vatan rinaeno syakato no Sya munijo manasyino ino raije rai?”

⁶³ Anawayo Vambunine wemirati mo kove raunande indamu vatane ukova no tawan, yara vatano mine so wo kove umaso raunande kakai weye awa vambunine mamaisye ramu. Sya ayao syo raura wasaije so Anawayo Vambunine mo raunande, muno omamo mbambunin indamu mo kovo nuge nuganui raunande wasai. ⁶⁴ Weramu weapamo inta wapanave ramu.” Yesus po ana umaso raura weye Po vatane manuga raeno wusyimbe to: vatano rui nawi indati wanave jeben muno vatano rui pirati po amavun indamu aubaisy. ⁶⁵ Yesus po raura iridi pare, “Indati

vatane inta wanave Rinai jewen. Wemi mbewar Syo raura wasai umawe rai syare vatane inta de Rinai tatuga bayave ramu. Yara vatano rui pirati Injaya po amayar dati, wepi de Rinai.”

⁶⁶ Arono naije Yesus apa arakove wanui inta wonae Ai ti wansuk akirive kobe, naije utavondi Ai jakato jewen.

Petrus po taune anave raura

⁶⁷ Naije Yesus po raura nanto Apa arakovo mansano abusyinara eane jirume umaso mansai pare, “Weapamo wapare wanajiv tavon dako jwena e?”

⁶⁸ Simon Petrus po raura akananto Yesus ai pare, “Injae, are pirati reanta Ai jakato? Winyamo nya ayao wemirati mo kovo nuge nuganui raurande. ⁶⁹ Reamanave Nai muno reamo naen Winyamo Vatano Kakavimbe no no Amisy ai umba Po natutir de reansai pi Winy.”

⁷⁰ Yesus po raura akananto mansai pare, “Risyamo syo arakove wasano abusyinara eane jirume wasatayao to. Weramu wea tenambe so, vatane inta pirati panapatambe Anakakai Akoe ai!” ⁷¹ Vatano Po aura so wepirati Yudas, Simon Iskariot apa arikainye piye, weye wepirati pare po Yesus amavun indamu aubaisy. Opamo Yesus apa arakovo abusyinara eane jirum inta piye.

7

Yesus poroto no Yerusalem weye Yahudi wo awa ono manakoe inta rave

¹ Naije Yesus panya propinsi Galilea raita, yara ponae panya no Yudea weye vatano Yahudi una no naije ware ubeker da wo aubaisy. ² Arono

naije Yahudi awa Ono Wo Randume Ransano mangkepan to. ³ Yesus apa rijate wo anajo ware, “Mbeanimaibe wino tawan bayave no Galilea so?! Nseo! Winyoronto no Yudea indamu Nya arakovo utavondi nai wo Nya ana nyo rave raen. ⁴ Weye vatane inta beker pare apa tame manakoe, weamo po apa ana dave raroron kakavimbe. Yara po rangkokaibe no vayave munijo mamaune rai, weamo mamaisye ramu. Weti reamare Nyo nya ana ndave raugav no kakavin indamu munije tename so wo naen tenambe.” ⁵ Yesus apa rijate wo aura taije maisy weye wanave Aije ramu.

⁶ Weti Yesus po raura akananto mansai pare, “Sya masyoto Amisye po ratayao Rinaije mamai dainya, yara weapamo wapare masyoto rui vayaveamo wata kai. ⁷ Vatano mine so nawamo manuga ngkakaijo wasaije ramu, yara manuga ngkakaijo Rinai weye risyo vatano mine so awa ana udave ngkakainoanive raura kakavimbe. ⁸ Wata one wato rai kai! Yara Risyamo syore rainy, weye Sya masyote mamai dainy.” ⁹ Yesus po ayao umaso raurana mewen, umba no tawan no Galilea.

¹⁰ Weramu arono Apa rijate wuruta no ono akoe umawe rai to, Yesus poroto tavon, weramu poroto maninimbe weti vatane wo aene ramu. ¹¹ Vatano Yahudi wo akani no ono namije rai indamu wo aubaisy, weti wo raura ware, “Yesus opamo nori rui?”

¹² Munu vatano wanui wo Yesus ansamuabe taune mansai vambinibe. Inta ware, “Wato pamo vatano kove pa!” Weramu inta wo raura ware, “Jewena! Yara Po vatane maponae.” ¹³ Weramu

vatano wanui umaso wo Yesus aura kakavimbe no vatano Yahudi mansamune ramu, weye wo Yahudi masyaniv.

Yesus po taune aura kakavimbe

¹⁴ Vatane wo awa ono namije rave masyote inta yai jakato, umba Yesus to no Yavaro Amisye rai pananyaube no naije. ¹⁵ Weti vatano Yahudi upaparo mansai, ware, “Yesusa be sekorave rainy, weramu Po anyao so raen dave. Are pirati po anyao ti payaoware so?”

¹⁶ Yesus po raura akananto mansai pare, “Sya anyao mamu muje no taune Rinai ramu, yara no no Injayo po inatutire Ai. ¹⁷ Are pirati pare po Injae apa bekere rarijat, weamo indati po ranaun Sya anyao so ama nori rati Injae ai, yara nori rati taune Rinaije ramu. ¹⁸ Weye vatano are pirati po taune apa ana datantona bo raurave, weamo apa bekere mamu po taune aijaseo titive. Weramu are pirati po raura indamu po Aja po atutire aijaseo titive, weamo mamai tugae pije, yara ayao angkarije mewen irati ai. ¹⁹ Musa po Amisye apa anyao raunande wasai to, weramu weapamo wapo anyao umaso rarijate ramu. Wabeanimaibe wapare weapo inaubaisy?”

²⁰ Vatano wanui umawe wo raura ware, “Are pirati pare po naubaisya? Reamamo jewena! Winyamo anawayo kakaije siso Naija!”

²¹ Weramu Yesus po raen onawamo uparijo Ai jivae, weye ware Apa anapaporainye mamu anakere ma, vemo Po rave no masyoto sambaya rai nora. Weti Po raura akananto mansai pare, “Syo anapaporainye intabo rave, weramu

waparijo Rinai weye Syo rave no masyoto sambaya rai. ²² Weramu weapamo arono masyoto sambaya wapo sunative wapa arikainye mansai,* weye Musa po ananyao sunat raugaje wasai to. (Weramu tugae, Musa wepirati po raugaje jewen, yara aneno wusyin nawirati wo raugaje arono Musa ano rainy.) ²³ Wapare vemo wapo Ananyao Musa rakanyoandi nora, weti ananyao sunat omamo watavondi rai no masyoto sambaya rai kai.† Weti arono masyoto sambaya nandijawe Risyo saumane raunanto vatano gwanene ai ti anasine nsauman kobe, wabeanimaibe waparijo Rinai? ²⁴ Vemo wapo anakotare rapatimu mamaisyo ana wadaeno wasamije bo raije rai nora. Yara syare wapo ratantona mavabe rati indamu wapa ana wapo rapatimu mamai tenambe.”

Yesus opamo nori rui umba de

²⁵ Arono naije vatano una no Yerusalem inta wo Yesus aura ware, “Vatane so pirati wama akarije ware wo aubaisye pije! ²⁶ Weramu wamo Yesus anyanyut pananyaube no vatano wanui mansamun umawea wama akarije umanin bayavea, wo ayao inta rasakinav akananto Aije

* **7:22** Vatano Yahudi ware masyoto sambaya mammo vemo vatane wo anakere rajaro rai nora. Muno ware Yesus apa anapaporainye mammo anakere ma, yara ware utavondi sunat rai omamo anakere ma jewena. † **7:23** Vatano Yahudi awa ananyao sunat no taiso: Arono arikainyo anya ano aje apa masyote kaumandei, weamo be sunative indamu ato siso Amisye apa kawasae mansai. Yahudi wo ratantona ware ananyao so manakoe weti wo rarijat mavabe. Weti ranivara arikainyo ano aje apa masyoto kaumandei nande mamai no masyoto sambaya rai, weamo tavondi koano sunat rai kai.

ramu. Indako wama akari so onawamo wanave Ai ware wama Mesias wepije to rako?[†] ²⁷ Weramu Yesusa pamo apa no raije mamu reamo raena, yara Mesias opamo arono rui rati pare de, weamo Apa no rai ti de mamu vatane inta po raene ramu.”

²⁸ Naije Yesus pananyaube no Yavaro Amisyee rai, gwaina pare, “Risyamo wapo inae ivae muno Sya ino rai mamu wapo raen tavon. Weramu ide taune Sya bekere rai ramu, yara Amisyee tu-gae wepi po inatutir. Amisyee so weapamo wapantatukambe Ai. ²⁹ Taune Risyamo syo Injayo Amisyee aen, weye ino no Wenui umba ide muno Wepi po inatutir.”

³⁰ Vatano Yahudi wo Yesus apa ayao umaso raraniva mewen, ware ubeke damu wo aijar. Weramu vatane inta pana pantukamo Ai rainy, weye Apa masyoto Amisyee po ratayao Aije ndea mamai dainy.

³¹ Weramu vatano wanugano naije wanui rave wanave Ai. Wo raura ware, “Tugae, sopamo Mesias wepi de to ije. Weye Apa anapapoinyoo po rarorone manui rave, maisyare Mesias amaisy.”

³² Vatano Parisi udaniv nanto wo ranauno vatano wanui umaso wo Yesus ansamuabe mansai vambinibe ware Opamo Mesiasa piye. Wetiva vatano Parisi wato muno syeno akokoe wo naito wo Yavaro Amisyee ramane inta matutir indamu wo Yesus aijar.

[†] **7:26** Tamo Mesias mo tamo Kristus ramaisy, ama ayao mare, “Vatano Amisyee po apatimu indamu be akari titive wansai.”

³³ Naije Yesus payao pare, “Risyamo ino akato wasarijata masyote nggwaravainy akatoe ramu, yara kavinta umba syakato no Injayo po inatutire nui. ³⁴ Weapamo indati wapo inakani, weramu wananta Rinai kakai. Weye munijo syoroto rai, weapamo indati wata rai kakai.”

³⁵ Vatano Yahudi wayao vambinibe mansai ware, “Apa munije rui mirati pare to no rai weti wananta Ai kakai? Indako pare nin da tavondi wama arakovo Yahudi nanawirati utantuna no munijo marano Yunani mai rako? Pare po vatano Yunani una no naije mansanyaube rako? ³⁶ Apa ayao po raura pare, ‘Weapamo indati wapo inakani, weramu weananta Inai kakai, muno munijo syoroto rai, weapamo indati wata rai kakai,’ Apa ayao so ama ine no tai rui?”

Yesus apa ayao maisyare mana ami njayaisy

³⁷ Ono namije ama akari rai arono ama masyoto akoe, Yesus seo tet muno gwain pare, “Are pirati awa ngkangkamandi, weamo de Rinai muno po mana ramanam! ³⁸ Maisyare Ayao Amisye mo raura mare: are pirati panave Rinai, indati vatano napije kove ntipu anuga rai, maisyare mana ntipu irati mana ami rai ti njam.” ³⁹ Yesus apa ayao mbe ananeneaebe umaso ama ine no taiso: Mana umawe raurata irati Anawayo Vambunine rai, Namirati indati mare majeo vatano wanave Yesus aije mansai. Weramu arono naije Anawayo Vambunine mamu maje rainy, weye Yesus kakai muno kovakato rainy.

⁴⁰ Vatano nanawije inta wo Yesus apa ayao namije ranaun, weti wo raura ware, “Sopamo tugae rave anawae aurairive wamo anyube pi so.”

⁴¹ Muno kaijinta wo aura tavona ware, “Mesias wepi so, Napi Amisye po atutir de wansai.”

Weramu kaijinta wo aura ware, “Opamo jewena, Mesias opamo no no Galilea umba de ramu!

⁴² Weye Ayao Amisye mo raura mare Mesias opamo de no Daud apa susye rai muno nori rati Betlehem, munijo wusyinoe aneno Daud tuna rai.”§ ⁴³ Maisyare omai ti, vatano wanui awa ana udatantona Yesus ai mbe intabove jeben ti wayaowi Ai. ⁴⁴ Vatano nanawije inta ubeker ware wo aijar indamu wo ave tatugadi, weramu vatane inta pana pantukamo Ai rainy.

Nikodemus payao po Yesus aoraijo vatan akoe mansai

⁴⁵ Umba naito wo Yavaro Amisye ramane umaso wakata, naije syeno akokoe muno vatano Parisi wo manajo nande ware, “Wabeanimaibe wapo augave jeben?”

⁴⁶ Naije vatano wo Yavaro Amisye ramane umaso wo raura ware, “Vatane wato apa ananyao ngko dave. Ananyao kaijinta mo Apa ramaisye ramu!”

⁴⁷ Vatano Parisi wo raura akananto mansai ware, “Ee! Weapamo Yesusa po wasaponae tavon to e? ⁴⁸ Yara Yahudi wama akari nawe Parisi reame inta wamanave Yesus aije jeben bayavea!

⁴⁹ Vatano wanui wato obo wanave Ai, weramu onawamo wantatukambea, wo Ananyao Musa raene ramu. Indati Amisye po mangke raugaje mai jaje.”

§ 7:42 Tugaeyamo Yesus ano no Betlehem (Lukas 2:4-7), weramu vatano Yahudi umaso wo rakarae ware ano no Galilea.

⁵⁰ Nikodemus, napirati wusyinoe de Yesus ai, no no naije, po vatano Parisi umaso awa ana wo Yesus aura tantunawije ranaun. Nikodemus pamo vatano Parisi pije tavon, weti payao nanto mansai taiso: ⁵¹ “Wakoe! Animaisye mi wapare wamo rave Yesus ai? Ranivara vatane inta po Apa ana dave raura kakavimbe rainy, weamo vemo wamo mangke rapatimugo Ai vayave nora. Omamo mamaisyo wama ananyao raije ramu.”

⁵² Naije apa arakove umaso wo raura akananto Nikodemus ai ware, “O! Mbeanimaibe wintavondijo vatano Galilea wato Ai? Winyamo vatano Galilea tavon dako? Nyo Ayao Amisye ranyao kobe rati! Weye Galilea omamo anawae inta no no naije umba deye ramu.”

⁵³ Naije unajiv no taune awa yavare ranteter.

8

Wanya anaerere ugavo rai

¹ Weramu Yesus poroto kobe no Pukamo Saitun.
² Awatan ngko dave pakare akato no Yavaro Amisye rai, muno vatano wanui rave ude irati Ai. Yesus tuna po manyao. ³ Umba kuruno makari mbaro Ananyao Musa rai muno vatano Parisi wo wanya anaerere ugavo rai inta raugav ude no Yesusa nui. Wo wanya umaso raugave usya nte no awa yasyin. ⁴ Umba wo raura ware, “Injayo Kurune, wanya so omamo reamo raijar weye reamo raen kavoe mo ayao kakai anaerere rave. ⁵ Musa apa ananyao inta mare wanya anaerere maisyare so omamo orame rave ramaug

ava ngkakai.✧ Weti, Kurune, Winya ana ndatan-
tona mamu noare rui?” ⁶ Awa ana wo raura so
ware wo Yesus atopan indamu payao tatugadi,
weamo wo kakai rantuna Ai kobe.

Weramu Yesus beaje po apa kawije veano ana
ratoe no kopa. ⁷ Wo anajo tutir, weti beakaeyo
naije Po raura akananto mansai pare, “Weapamo
are pirati ayao kakai meweno ai, weamo manasy-
imbe po orame rave wanya so ramaug.” ⁸ Naije
beakaje Po ratoe akato.

⁹ Weramu arono wo Yesus apa ayao so ranaun,
unajivo nanentabo eve, weti manasyimbe anan-
uiny dave mansai. Unajiva mewen dave, weti
Yesus obo no kobe no naije muno wanya umawe
ma no tavona nene. ¹⁰ Yesus beakaeyo akato, Po
raura nanto rai pare, “Inya, wanya winy, vatane
umawe nawamo uta no rui? Inta ta no ra po
mangke rapatimugo naija e?”

¹¹ Ama ayao mo raura Yesus ai mare, “Injae,
jewena.”

Umba Yesus po raura nanto rai pare, “Risiamo
syo mangke raugaje nai tavone jeben. Nyoronto
muno vemo nyo ayao kakai rave akato inya, masy-
oto unumeso kobe.”

Yesus wepirati baro mine so rai

¹² Umba Yesus po raura nanto vatano wanui
mansai jakato pare, “Risiamo inaurata irati vare
rai, ibaro vatano mine so mansanuga rai. Are
pirati tavondi Rinai, opamo panya kaumudi rai
jakatoe ramu, yara varo mo kove raunande
mbaro anuga rai tutir.”

✧ 8:5 Imamat 20:10; Ulangan 22:22-24

¹³ Vatano Parisi wo raura nanto Yesus ai ware, “Nya ayao wato mamaisye ramu, weye taune Winyo taune naura kakavimbe. Vatane po taune aura, weamo vatane wanave aije ramu.”

¹⁴ Yesus po raura akananto mansai pare, “Risyamo syo taune inaura kakavimbe kai, weramu taune Syo inaura kakavimbe somamo tugae muno mamaisy, weye Risyano rai ti de mamamo taune Syo raen muno Risyano syakato rai mamamo taune Syo raen tavon. Weramu weapamo wapantukambe Sya no rai ti de rai muno syakato raije rai. ¹⁵ Weapamo wapo mangke rapatimu mamaisyo vatano mine so awa ana udatantona rai vayave. Yara Risyamo syo mangke rapatimugo vatane inta ai ramu. ¹⁶ Weramu ranivara Syo mangke rapatimu, weamo mangke namije mamaisy, weye taune Ribui syo rapatimuge ramu, yara Injayo po inatutire pamo tavondi inautan. ¹⁷ Muno wapa Ananyao Musa ama ayao inta ratoe taiso: Vatane intabo po anakotare inta raura omamo mamai dainy, yara vatane jiruma aya ayao intabo irati anakotare umaso rai, weamo mamai to ti wamanave rai. ¹⁸ Weti vatane jiruma yo inaura kakavimbe taiso: manasyimbe, taune Risyano inaura kakavimbe, muno jirum, Injayo po inatutire po inaura kakavimbe.”

¹⁹ Naije wo raura akananto Ai ware, “Weti Nya Injaya nori rui?”

Yesus po raura akananto mansai pare, “Risyano muno Sya Injaya, weapantatukambe Ririnsai. Ranivara wapo inaen, weamo Sya Injaya wapo aen to.” ²⁰ Yesus po apa ananyao so raura aje

☆ **8:17** Ulangan 19:15

no Yavaro Amisye ama uga rai, mararaijo bayaijo namirati vatane wo doije raugasyo raije rai. Muno vatane inta po aijare ramu, weye Apa masyoto Amisye po ratayao Aije mamai dainy.

Yesus apa no rai mamu mine so ma jewena

²¹ Umba Yesus po raura nanto vatano wanui mansai jakato pare, “Risyamo syoroto muno weapamo indati wapo inakani. Weramu wananta Rinai jeben, weye munijo syoroto rai mamu maweso weade rai jeben. Weapamo indati wakakai wapa ayao kakai rai.”

²² Weti akarijo Yahudi wo raura ware, “Veanimaibe Yesus po raura pare, ‘Munijo syoroto rai mamu maweso weade rai jeben’? Indako pare Po taune aubai dako?”

²³ Umba Yesus po raura nanto mansai pare, “Weapamo vatano mine nawirati weap, yara Risyamo sya munije mi munijo ntiti warae. Mine somamu wapa munije mijem, yara Risyamo sya munije ma jewena. ²⁴ Wemi mbewar umawe Syo raura wasai syare weapamo indati wakakai wapa ayao kakai rai. Weye ranivara wapanave Rinai jeben arono Syo inaura kakavimbe syare Risyamo are pi Risy, indati tugae rave wakakai kobe muno wapa ayao kakai mamu Amisye po rapaya wasaije ramu.”

²⁵ Weti wo anajo ware, “Are pi Winy?”

Yesus po raura akananto mansai pare, “Veanimaibe syayao akanande wasai? Arono manasyinoe Syo inaura kakavimbe tenambe to. ²⁶ Ayao rapatimu syare Syo raura wasai manakoe weye wapa ana wadave ngkakai. Injajo po inatutire

Apa ayao mamai dave, muno ayao rui mirati idaranivo Ai wemi Syo raura kakavimbe irati vatano mine wasai.”

²⁷ Yesu po Ajayo Amisye aura umaso, weramu vatano wanui nanawije wantatukambe rai. ²⁸ Weti Po raura mansai pare, “Arono indati wapo Arikainyo Vatane inauseo inyo kapite rai, wea umba wapo raen Sya ayao syo inaura kakavimbe mamu mamai dave. Muno Risyamo sya ana syo rave mamu no no taune Rinai ma jewena. Yara ananyao rui mirati Injaya po raura Inai webo mirati Syo raura. ²⁹ Wepirati po inatutir, muno tuna inautan tutir. Po inapaya syanya syayave ramu, weye Sya ana idave mamaisyo Apa bekere rai tenambe, ti anayanambe Rinai.”

³⁰ Arono Yesu po ananyao kotare umaso raura, vatane wanui rave wanave Ai.

Yesu po Amisye apa ayao tugae raura

³¹ Naije Yesu po raura nanto vatano Yahudi nanawirati wanave Aije mai pare, “Ranivara weano tawan no Sya ayao rai, weapamo tugae rave Sya arakovo watawondi rinai nawirati weap.

³² Indati weapo Amisye apa ayao tugae raen, muno ayao tugae so mo wasapaya irati anakotaro mo wasaijaro arove rai.”

³³ Umba wo raura akananto Yesu ai ware, “Veanimaibe Winyo raura nyare reamamo indati reampaya aro rai? Reamamo aneno Abraham apa susyo po reansampambe nawirati ream. Muno vatan inta wo reansaijaro arove ramu.”

³⁴ Yesu po raura akananto mansai pare, “Syo raura tugaive: are pirati po ayao kakaije rave,

weamo ayao kakai mo aijaro arove. ³⁵ Vatano aijaro arove ato siso yavaruga raije ramu. Yara arikainyo yavaruga opamo ato siso yavaruga rai no tawan tutir. ³⁶ Maisyare omai ti, ranivara Arikainyo Amisy risyo wasapaya aro rai, weamo tugae rave wapaya rai kobe. ³⁷ Weapamo Syo wasaen wana no Abraham apa susye rai, weramu wabeke damu wapo inaubaisy, weye Sya ayao mamu waponayo rai muno weapo raugave nsiso no wasanuga raije ramu. ³⁸ Ana rui mirati Syo raeno sya Injaya nui, wemirati Syo raura wasai. Weramu weapamo ana rui mirati wapo raranivo wapa aja ai, wemirati weapo raijar.”

³⁹ Umba wo raura akanande Yesus ai ware, “Reama injaya pirati Abraham.”

Umba Yesus po raura mansai pare, “Weapamo Abraham apa arikainye nawirati weapa jewena, weye weapa ana wadave nsasyeo Abraham apa ana dave rai. ⁴⁰ Weapa ana wadave mamu wabeke damu wapo inaubaisy. Weramu Risyamo syo ayao tugae obo raura wasai muno ayao tugae namije mamu Syo raraniv no Injayo Amisy ai. Vatano po ayao tugae raura pamo Abraham po aubaisy ramu. ⁴¹ Weti wapa ajae sasyeo Abraham ai. Muno wapa ana wadave mamu wapa aja apa ana dave mijem.”

Naije wo raura ware, “Reamamo arikainyo insumaije jewena! Yara vatano Yahudi reama Injaya intabo dave, Opirati Amisyee.”

⁴² Yesus po raura nanto mansai pare, “Ranivara Amisyee pamo wapa Ajae waino ai ratire, weamo weamuinyo Inai, weye risyamo ino no Injayo Amisyee ai umba syuje ti ide so. Muno ide irati

taune Sya bekere rai ramu, yara Injayo Amisy po inatutir apa bekere rai. ⁴³ Wabeanimaibe wananta Sya ayao so rai jewen? Indako waponae wapo Sya ayao raranivi? ⁴⁴ Anakakai Akoe wepirati wapa Ajae waino ai, weti weabeto irati apa bekere rai. Anakakai Akoe wepirati po vatane maubaisy arono manasyin dave rai muno opamo anuga mbeto ayao tugae raije ramu, weye anuga mamu ayao tugae ravaki rai jewen. Po ayao aarurijate raura tutir, weye anuga ntairijo angkarije rai. Anakakai Akoe pamo vatano arurijat akoe piye muno ayao arurijat kotar vatano mine so wo raura omamo no no Anakakai Akoe ai po raugaje. ⁴⁵ Weramu Risyo ayao tugae raura, muno weapanave Inai ramu. ⁴⁶ Weapamo wananta ayao kakai inta rai no Rinai jewen. Risyo ayao tugae raura, weti wabeanimaibe weapanave Inai jewen? ⁴⁷ Are pirati Amisye apa arikainye waino ai, opamo po Amisye apa ayaowe raraniv. Weramu wapo Apa ayaowe raranive jewen, weye weapamo Amisye apa arikainye waino wasai jewen.”

Yesus no wusyimbe, Po Abraham akivan

⁴⁸ Umba vatano Yahudi wo Yesus aura tantunawi ware, “Reama ana reamo raura umawe mamu no rai tugae: Winyamo vatano Samaria pi Winy!* Muno anawayo kakaije siso nanuga rai to!”

⁴⁹ Yesus po raura pare, “Anawayo kakai inta siso inanuga rai jewen. Ibeaje irati Sya Injaya ai, weramu weapo inaura tantunawi. ⁵⁰ Risyo

* **8:48** Vatano Yahudi onawamo manuga mamuno vatano Samaria mansai.

syo tamo ntiti rakani taune inamarome ramu, yara Injayo Amisyepirati po tamo ntiti raugaje Rinai. Wepirati indati po mangke rapatimugo vatano nanawirati wo inaura tantunawi mansai. ⁵¹ Syo raura tugaive: Are pi beto Sya ayao rai, opamo nanto wene raija nuge nuganuije ramu.”

⁵²⁻⁵³ Vatano Yahudi wo raura akananto Ai ware, “Wakoe! Winyo raura nyare, ‘Are pi beto Sya ayao rai, opamo nanto wene raija nuge nuganui ramu.’ Weramu Nya ayao so mamaisyepirati ramu weye Abraham opamo kakai, maisyare omai tavon Amisyepirati apa anawae wusyine nanawamo wene nde mansai tavon. Indako Winyamo nyanakoe reama aneno Abraham akivana rako? Opamo wene nde ai to! Anawae nanawamo wene nde mansai to! Weti Winyamo are pi Winy? Reamare Winyamo anawayo kakai siso nanuga rai to!”

⁵⁴ Yesu po raura akananto mansai pare, “Risyo tamo ntiti rakanijo inamarom, weamo mamaisyepirati ramu. Injaya wepi po tamo ntiti raunande Rinai, Napirati weapo aura wapare wapa Amisyepirati.

⁵⁵ Weapamo wapantatukambe Amisyepirati ai, weramu Risyo syo aen. Muno ranivara Risyo raura syare, ‘Risyo syantukambe Amisyepirati ai’ weratire, indati Risyo aarurijat akoe pi Risyo maisyare weasamaisyepirati. Weramu Syo raura tugaive: Risyo syo Amisyepirati aen muno ibeto Apa ayao rai. ⁵⁶ Arono wusyinoe wapa aneno Abraham ananibe weye po ranaun Sya masyoto syare ide no mine so raije pare po raen. Tugae, soamo Abraham po Sya ide no mine so raen to, weti ananibe rave.”

⁵⁷ Umba vatano Yahudi wo raura ware, “Nya

tume mamu nseo no tename jirum eane abusyini rainya nene! Umba winyare Nyo aneno Abraham aen e?”

⁵⁸ Yesu po raura akananto mansai pare, “Syo raura tugaive: arono Abraham avaki rainyamo, Risyamo rino to.”† ⁵⁹ Naije vatano Yahudi nanawije uparijo Ai, weti wo orame ratayao wo rave Yesu amaug ware wo aubaisy. Weramu Yesu kokaibe mansai muno puje Yavaro Amisy rai ti to kobe.

9

Yesu po saumane raunande vatano amije ntuba ai

¹ Arono Yesu panya pananave, to nanto vatano amije ntuba inta ai. Vatane so amije ntuba no arono ano kobeyoe. ² Yesu apa arakove wo anajo ware, “Injajo Kurune, arepa ayao kakai mo vatane so aveti amije ntuba: taune pi po rave rako, apa vatan anui nanai rako?”

³ Yesu po raura mansai pare, “Taune pa jewen, muno apa vatan anui nanaya jewen tavon, weramu beare so indamu Amisy apa vambunine raroron kakavimbe. ⁴ Syo raura anane-neaebe taiso: anakere raijaro simane rai omamo mamaisy, weramu arono namane nde, wamo anakere rapaya. Naisoamo Amisy wepi po inatutire Po varore raugaje wansai indamu wamo Apa anakere raijar, weramu kavinta umba wama varoro namije mare mewen kobe. Weti syare wamo Amisy apa anakere raijar naiso kobe.

† **8:58** Yesu apa ayao so mare Opamo po Amisy amaisy. Wemi mbewar ti vatano Yahudi uparijo Ai rave.

⁵ Arono rino no mine so, Risyirati varo mo kove raunande vatano mine so mansaije wepi Risy.”

⁶ Yesus po apa ayaowe so raurawa jewen, naije nyipube aje no kopa muno Apa nyipute rave kopa rakurive. Umba Po raunanto po rave vatano amije ntuba umaso amije raupaisy. ⁷ Muno Po raura nanto ai pare, “Nyoronto nyo namune rarandom no Waro Kampoa Siloam rai.” (Siloam mamoyo Yahudi ma, ama ine mare “Ratuti to.”) Weti vatane umaso to po amune rarondomo rai. Arono sakinav pare pakare, amije mpora ti po nuge raen.

⁸ Vatano ami ntuba umaso apa arakove nanawe, vatano wusyinoe wo aen panatambe ananuge raiveve nawe, soamo wo aen weti wo raura tenambe ware, “Vatane so pirati wusyinoe tuna panatambe ananuge raiveve wepi so dako?”

⁹ Inta nawirati wo raura ware, “Napi ivae.”

Weramu inta wo raura ware, “Opamo jewena, yara vatano kaijinta pi so, amune mo vatano amije ntuba umawe amaisya.”

Weramu taune po raura kakavimbe mansai pare, “Tugae, risyirati wusyinoe inamije ntuba!”

¹⁰ Naije wo raura nanto ai ware, “Animaisye mi nande nai ti namije mpora ti nyo nuge raene so?”

¹¹ Po raura akananto mansai pare, “Vatano apa tame mirati Yesus po kopa inta rakurive umba Po rave inamije raupaisy, umba Po raura pare, ‘Nyoronto namune rarandom no Waro Kampoa Siloam rai.’ Weti syoroto, inamune rarondomo rai, naije inamije mpora ti syo nuge raen kobe.”

¹² Weti wo anajo ware, “Vatano nyo aura wato, Napi rui?”

Po raura akananto mansai pare, “Syan-tatukambe.”

Vatano Parisi uparijo Yesus ai weye Po saumane raunande no masyoto sambaya rai

¹³ Naije wo vatano amije ntuba umawe augaveta no vatano Parisi mansamun. ¹⁴ Masyoto Yesus po saumane raunande vatano amije ntuba ai omamo vatano Yahudi awa masyoto sambaya mije. Vatano Parisi wo ratantona ware Yesus apa anapaporainye umaso mammo anakere ma, weti vemo Po rave no masyoto sambaya rai nora.

¹⁵ Umba vatano Parisi umaso wo vatano amije ntuba umawe anajo ware, “Animaisye mi nande nai ti namije mpora ti nyo nuge raen?”

Vatane umaso po raura akananto mansai pare, “Yesus po kopa raugaje inamije rai muno syo rarandom. Naije inamije mpora ti syo nuge raen kobe.”

¹⁶ Umba Parisije inta wo raura ware, “Yesus wato pamo Amisye po atutir de pa jewena, weye Po Ananyao Musa rakanyoandi. Po rakanyoandi arono Po anakere raija no masyoto sambaya rai.”

Weramu Parisi kaije wo raura ware, “Jewena! Vatano ayao kakai no ai pamo indati po anapaporainyo maisyare so inta rarorone ramu. Maisyare omai ti, wandaen Yesus pamo vatano ko dave.” Weti vatane umaso wayao ensembe mansai vambinibe.

¹⁷ Umba vatano Parisi wo vatane umawe anajo akato ware, “Vatano po namije raveti mpora ti nyo nuge raen pamo animaisye mi nyo ratantona Ai?”

Naije po raura pare, “Vatane so anawae pa.”

¹⁸ Weramu vatano Parisi wonae wanave anapaporainye umaso raiji. Ware, “Vatane sopamo amije mporaro anapaporaimbe tugae rako jewena rako? Indako arono manasyinoe amije ntuba ramu rako?” Maisyare omai ti, wo apa vatan anui yawainde, ¹⁹ muno wo yanajo ware, “Ipa arikainye so pirati ipare ano kobe wea amije ntuba rako? Veanimaibe soamo amije mpora ti po nuge raen?”

²⁰ Apa vatan anui yo raura akananto mansai yare, “Arikainye sopamo irima arikainye pa. Muno arono akoya mare mo ano ajeamo irimo aen, rima arikainye amije ntuba. ²¹ Weramu veanimaibe soamo amije mpora ti po nuge raen, muno are pirati po saumane raunande ai, irimamo imantatukambe. Weti taune wapo anajo weye opamo arikainy tuvane pa jewena, yara apa ana po ratantona matu to. Taune po raura wasai jaje.” ²² Apa vatan anui yo ayao so raura mansai weye yo akarijo Yahudi masyaniv. Yo masyaniv weye awa ayao mamai to ware vatano nanawirati wanave ware Yesus sopamo Mesias wepije, onawamo mangke raugaje mai indamu vemo waka-sisa yavaro sambaya rai nora. ²³ Ayao so mbe-war ti apa vatan anui yare, “Rima arikainye so arikainyo tuvane pa jewena, yara apa ana po ratantona matu to, weti wapo taune bo anajo kai.”

²⁴ Naije wo vatano ami ntuba umaso awain akato muno wo raura nanto ai ware, “Inya! Nyo ayao tugae bo raura weye soamo nyayao no Amisyeye amun ti! Wamo Yesus napije aen opamo Vatano apa ayao kakai no Ai.”

²⁵ Umba vatano uma saumane so po raura

akananto mansai pare, “Vatano napije apa ayao kakai no Ai pa rako, risyamo syantatukambe. Weramu sya ana syo raene mamu risyamo namanawe inamije ntuba, muno soamo inamije mpora ti syo nuge raen.”

²⁶ Umba wo ranajo ware, “Ana rui Po rave nai? Po namije raveti mpora ti nyo nuge raene mamu Po raveare rui?”

²⁷ Vatano napije po raura mansai pare, “Syo raura wasai to, weramu weaponae wapo raranivi. Wabeanimaibe soamo wabeker indamu syo raura wasai jakato? Indako wapare wabekero wappanave Ai, maisyare Apa arakovo utavondijo ai mansamai dako?”

²⁸ Naije wo vatane umaso akaajian wo aura ware, “Taune winyirati ntavondi Ai! Reamamo jewena. Reama ntavondi ai opamo Musa!

²⁹ Reamo raen Amisy e pamo po apa ayao raura de Musa ai to, yara Vatane wato pamo reamamo reamantatukambe Ai: Opamo no no rui umba dea?”

³⁰ Vatane umaso po raura akananto mansai pare, “Sinam dave irati wepantatukambe Apa munijo no rai ti de rai, yara Po inamijo ntuba raveti mpora ti syo nuge raen. ³¹ Wamo raen vatano ayao kakai no mansai wenawamo Amisy e po maranive ramu, yara vatano ubeaje Ai muno utavondi Apa bekere rai wenawirati Po maraniv.

³² Arono munije so ama manasyine raija ndea unumeso rai, vatano amije ntuba no arono ano aje kaijoe inta amije mpora tai somaisy indamu wamo anaumbe rainy. ³³ Ranivara vatane wato

pamo no no Amisye ai jewen, weaveti Po anapa-porainye inta rarorone ramu.”

³⁴ Wo raura akananto ai ware, “Nyare? Winyirati ayao kakai ntapekano nai rave arono navaki ajewe, weti mbeanimaibe nyare nyo reansanyao?” Arono naije kobe wo aorai siso no yavaro sambaya rai.

³⁵ Yesus po ranaun wo vatane umaso awatambe ti pusyo. Weti nanto ai muno Po raura ai pare, “Winyamo nyanave Arikainyo Vatan ai rako?”

³⁶ Vatane umaso po Yesus anajo pare, “Injae, are pi Nyo aura we? Syare Injae nyo aura rinai indamu syanave Ai.”

³⁷ Yesus po raura pare, “Vatano napije pi Risy: Risyi nyo inaeno namije rai muno soamo syayao nande nai.”

³⁸ Naije po raura pare, “Injae, soamo syanave.” Po vukane ranteteraje no Yesus amun muno beaje Ai.

³⁹ Yesus po raura pare, “Ride no mine so indamu Syo ayao mamaisye rapatimu vatane mai. Wirati vatano mamije ntuba nanawamo indati wo nuge raen, yara vatano mamije ngko ti wo nuge raen to indati wo raen akatoe ramu yara mamije ntuba.”

⁴⁰ Vatano Parisi una no naije inta wo Yesus apa ayao umaso ranaun, weti wo anajo ware, “Reamamo reansamije ntuba tavon dako?”

⁴¹ Umba Yesus po raura akananto mansai pare, “Weapamo wapo raura wapare weapo raeno wasamije rai muno wapare wapo Ayao Amisye raen. Weramu weapamo watavondijo Amisye ai jewen, weti wapa ayao kakaije no tawan no wasai. Ranivara wasamije ntuba ratire, indati

wapantatukambe ayao kakaije rai, ti Amisye po mangke raugaje wasai jewen.”

10

Yesus aurata irati vatano po maero domba makum

¹ Yesus po raura pare, “Syo raura tugaive: arono vatano anaonoan siso no tanoano maero domba makumo raije rai, opamo po ama unsanda rausiso jewen yara po ama yane rarijati umba to siso. ² Weramu vatano po unsanda raisiso, wepirati vatano po maero domba makum. ³ Vatano napije pamo vatano po unsanda ramane po unsanda rausiso ai, muno po maero domba awa tame rawain, weamo wo araniv muno po maugav wusya. ⁴ Arono po maugava wusya, panya no wuisy muno maero domba wo arijat weye wo anamote ranaun to. ⁵ Weramu vatano no no maran inta de, weamo maero domba utavono ai jewen, yara unajiv ti uta aora weye wo vatano maran anamote ranaune ramu.”

⁶ Wemirati Yesus po raura ananeneaebe mansai, weramu unanta ama ine raije jewen.

⁷ Weti Yesus po raura intabo akato pare, “Syo raura tugaive: Risyirati rinaurata irati tanoano domba ama unsanda rai. ⁸ Vatano ude wuisyeve Rinai wenawamo vatano anaonoan tenambe, weti maero domba wo manamote raranive ramu. ⁹ Risyirati syo inaura ananeneaebe tai rati unsanda rai, weti are pirati panya de siso po unsanda so raide, weamo Syo apaya apa ayao kakaije rai indamu apave kovo nuge nuganuije rai. Opamo aurata irati Sya domba inta ai, weti indati siso

domba awa tanoane rai umba siman akato pusyo po apa anaisye rakani. ¹⁰ Vatano anaonoan apa bekere mamō panaonoambe muno po domba maubaisy weti makanive. Yara Risyā ide no mine somamo indamu vatane awaura kovo nuge nuganui rai muno Syo kove raugaje ti ntairi mai.

¹¹ Risyirati syo sya maero domba maeranande mavabe. Weti Syo inanasine raunandea ikakai indamu Syo sya domba mapaya kakaije rai. ¹² Weramu vatano apa anakere mamō doiije rave avae indamu po maero domba maeranande, opamo po maeranande mavabe jewen weye apaura domba umaso maije ramu. Weti arono po makeo sivuiny aeno dei, janiv ti nin ti to maere umawe mansaora. Naije makeo sivuiny siso pare po domba maubaisy weti domba unajiv tenambe ti mangkat kobe. ¹³ Vatane wato opamo nin ti to maero domba maora weye apa anakere mamō doiije bo mirati po rakani. Bekobe domba mansai mamō meweno anuga rai.

¹⁴ Weramu Risyamo risyirati syo sya domba maeranande mavabe. Syo raura ananeneaebe, weye Sya domba maurata irati Sya kawasae mai. Syo sya kawasae mansaen tenambe muno wenawamo wo rinaen tavon, ¹⁵ maisyare Injaya Amisyē po rinaen muno Risyō Injaya aen. Syo inanasine raunande ti ikakai indamu Sya kawasae awave kove rai. ¹⁶ Syaura vatano kaijinta mai nanawirati mato siso kawasae so mai tavone jewen. Onawamo syare Syo maugave

siso tavon.* Wo inanamote raraniv tavon, indati Syo manugan ube intabove Sya kawasae umawe matavon. Weti awaura anugane intabo rai muno awaura Akarije intabo ai, Wepirati Risy.

¹⁷ Injaya muiny irati Rinai weye Syo inanasine raunandea ikakai indamu ikovakato. ¹⁸ Vatano rui pare po inaubaisy opamo apa vambunine mamaisyewen. Yara Syo inanasine raunandea mamaisyewen taune Sya bekere rai. Risy vambunin inanasine raunanto ikakai muno Risy vambunin ikovakato. Risy anakere somamo Syo raugav no Injaya ai.”

¹⁹ Vatano Yahudi usayai no naije wo Yesu apa ayao umaso ranaun, weti wayaowi vambinibe weye awa ana wo ratantona mbe jirumbe.

²⁰ Wanui rave inta wo raura ware, “Anawayo kakai inta siso anuga raija muno anaivi mo ave. Veanimaibe wapo aranibe?”

²¹ Weramu kajinta wo raura ware, “Vatano anawayo kakai siso anuga rai pamo payaoware wato maisyewen ramu. Muno anawayo kakai opamo bambunin po saumane raunanto vatano amije ntuba aije ramu.”

Vatano Yahudi wo Yesu atugaro marambe

²² Arono naije vatano Yahudi wo ono akoe rave no Yerusalem. One somamo indamu vatano Yahudi maemendi Yavaro Amisyewen ama masyoto manasyimbe ama unsanda rausiso raije rai. Arono naije ovaro nanayao tami. ²³ Yesu pananave no Yavaro Amisyewen ama repono Salomo

* **10:16** Yesu apa kawasae kajinta onawamo vatano wanave Ai nanawirati una no rui rui vayave no mine tename so.

rai. ²⁴Weti vatano Yahudi wanugano akiani muno wayao nanto Ai ware, “Mbeanimaibe Nyo ana no nai rangkokaibe reansai? Reamare Nyo naura kakavimbe: Winyamo tugae rave Mesias, wepi Win dako?”

²⁵Yesus po raura akananto mansai pare, “Syo raura wasai to, weramu weapanave Sya ayaowe raije ramu. Risyi syo anapaporainye raroron manui rave, mamaisyoy Injayo Amisyey apa bekere rai. Sya anapaporainye umaso mo Sya vambunine raroron kakavimbe irati wasai to. Weramu weapanave raije jeyen tavon. ²⁶Weapamo wapnave jeyen weye weapamo wasato sisy Sya maero domba maije ramu. ²⁷Sya maero domba wo inanamote raraniv. Risyamo syo mansaen muno utavono Inai. Sya domba umaso maurata irati Sya kawasae mai. ²⁸Risyo kovo nuge nuganyui raunanto Sya kawasae mansai indamu una tawan muno wene makare mai jeyen. Vatane inta po manaonoambe inaneme raora jeyen. ²⁹Sya Injaya, Wepirati po maunande Rinai to, Apa vambunine manakoe rave, mo vambunino kaijo rui rakivan bintabo. Weti vatane inta po Sya kawasae mantauno Injaya aneme rai kakai. ³⁰Risy muno Sya Injaya irimamo intabo.”

³¹Naije vatano Yahudi wo orame raugav akato, ware wo rave Yesus amau da kakai. ³²Weramu Yesus po raura nanto mansai pare, “Syo anapaporainyo manakoe manui rave rarorono wasai to, namirati Injaya po raunande Syo raijar. Sya anapaporainyo namije rui mirati mbewar ti wapare wapo rinamaugo rai?”

³³Vatano Yahudi wo raura nanto Ai ware, “Nya

anapaporainyo nyo raroron wemirati mbewar ti reamo orame rave namaug, oma jewena. Yara Winyo Amisyeye aura tantunawi weye winyare Winyamo Amisyeye pi Winy! Weramu wandaen Winyamo vatan bayave pi Winy. Nyo Amisyeye aura tantunawi, weti reamare reamo naubaisy.”

³⁴ Umba Yesus po raura pare, “Tugae, Amisyeye taune po raura pare, ‘Weapamo maisyare Amisyeye amaisy.’[☆] Ayao umaso ratoe no Ayao Amisyeye wapare watawondi rajje rai. ³⁵ Wandaen ayao ratoe Ayao Amisyeye rai mamo wamo inta ranigwane kakai. Maisyare somaisy, Amisyeye apa ayao umawe no rai tugae, namirati Po raura pare vatano wo Apa ayao rajjare nawamo ‘maisyare Amisyeye amaisy.’ ³⁶ Weti Amisyeye po mawain taije maisy, wabeanimaibe weapare Risyo Amisyeye aura tantunawi weye Risyo raura syare Risyamo Arikainyo Amisyeye? Yara Risyamo Injayo Amisyeye po inapatimu muno Po inatutir ide no mine so. ³⁷ Ranivara anakero Injaya po inatutir Syo rajjare jewen datire, weamo vemo wapanave Rinai nora. ³⁸ Wapare wapanave Rinai jewen, weamo syare wapanave Sya anapaporainye obo rai, weye omamo Amisyeye apa anakero Syo rajjare mije. Maisyare naije, weapo raen muno weananta rai: Injaya pamo no intabov Inai muno Risyamo ino intabov Injaya ai.”

³⁹ Vatano Yahudi umaso ware ubera wo Yesus aijar akato, weramu Yesus nino mansai ti to.

Yesus to no mana Yordan ama ranijo warani

[☆] **10:34** Mazmur 82:6

⁴⁰ Yesus po mana Yordan raotar akato, to nanto no ama ranijo warani, namirati wusyinoe Yohanes po vatane maugasya kuvuni mana rai. Umba Yesus no tawan no naije. ⁴¹ Muno vatano wanui ude Ai. Wo raura mansai vambinibe ware, “Yohanes po anapaporainye rarorone ramu, weramu ana po Vatane so aura mamu no rai tugae.” ⁴² Muno vatane wanui rave no naije wanave Yesus ai.

11

Lasarus gwanen dave ti kakai

¹ Vatan inta apa tame mirati Lasarus opamo nori rati Betania. Muno apa aname jiruma, aya tame mirati Maria muno Marta, inya no munijo namije rai tavon. ² Maria umaso mamu wanya mo manino mbovove rauvaro Amisy Yesus ajoe rai muno mo rakarivuinnye veano ajo raupaisyo mije. ✧ Masyote inta Lasarus gwanen. ³ Weti apa aname umaso yo aya arakove inta atutir de no Yesusa nui po aya ayao raura Ai taiso: “Injae, rima anakavo Injae nanuga no ai rave opamo gwanena.”

⁴ Arono Yesus po ayao namije ranaun, Po raura pare, “Wanene somamo mo wene raugave ramu. Yara wanene so nande arakovo Lasarus ai indamu Injayo Amisy po apa kovo ntiti raroron kakavimbe muno Po Arikainyo Amisy risya kovo ntiti raroron tavon.”

⁵ Yesus muiny irati Marta, Maria muno Lasarus mansai. ⁶ Weramu arono Po Lasarus anaun gwanen, weamo no vayave no naije masyote jirum

✧ 11:2 Yohanes 12:3-8

akato. ⁷ Masyoto jirumo nanaije mewen, umba Po raura nanto Apa arakovo utavondi ai mansai pare, “Wade wamakata no munijo Yudea.”

⁸ Wo raura ware, “Injayo Kurune, kavoe vatano Yahudi una no Yudea ware wo orame rave winaepar, ubeker wo naubaisy. Weti mbeani-maibe nyare nyakato no ratuije?”

⁹ Yesus po raura ananeneaebe mansai pare, “Masyote anteter mba dave arono uma seo ao to pasyo akato. Weti vatano panya arono sansimane ntami apa kawi rantukame ramu, weye uma bar ti po apa unanuije raen kobe. ¹⁰ Weramu vatano wanya arono namane ntami indati awa kawije rantukam weye nuge ngkaumur. Sya masyoto ikakai rajje nde rainy, weti wanta kai.”

¹¹ Umba Yesus po raura akato pare, “Wama arakovo Lasarus niki to, weramu Risyamo kavinta ito Syo amin.”

¹² Yesus apa arakovo utavondi ai wo ayao rasakinav ware, “Lasarus niki, wea kavinta sauman.”

¹³ Yesus apa ayao ama ine mi so: Lasarus opamo kakai to. Weramu Apa arakove wo rakarae ware Yesus pare Lasarus ta niki vayavea. ¹⁴ Maisyare omai ti, Yesus po raura kakavimbe mansai pare, “Lasarus opamo kakai to. ¹⁵ Arono kakai kobe, rino no ratuije ramu. Weramu inanayanambe weye syare Syo ana inta rarorono wasai indamu wapanave kobe. Soamo wade wanta no Lasarus nui.”

¹⁶ Naije Tomas napi aura tavonamo Didimus (weye arikainyo tapume pa) po raura nanto Yesus

apa arakovo kaijinta mansai pare, “Wade wantavondi ai muno wangkakai atavon!”

Yesus po Marta muno Maria yayove

¹⁷ Arono Yesus puiya nanto no Lasarus norije rai, Lasarus tami no aipapo raija masyote mambi to. ¹⁸ Munijo Betania mangkepan no Yerusalem, ama waravainye mamo kilometerije mandei. ¹⁹ Vatano Yahudi wanui rave ude wo Marta muno Maria yapan indamu woyov weye aya anakavo kakai.

²⁰ Arono Marta mo Yesus anauno dei, muje ti nande Ai no apa unanuije rai, yara Maria no no yavare ama uga. ²¹ Marta mo raura nanto Yesus ai mare, “Injae, ranivara Winy no no naiso ratire, sya anakavo pamo kakai ramu. ²² Weramu syo raen Amisy e pamo indati po Winya nyo ranajo Ai raunande.”

²³ Yesus po raura akananto Marta rai pare, “Nya arakova indati kovakato no wene rai.”

²⁴ Marta mo raura mare, “Syo raen Lasarus kovakato arono munije ama akari.”

²⁵ Yesus po raura nanto rai pare, “Risyrati syo kove raunande muno Syo kovakato raunanto vatano kakai to mansai. Are pirati panave Rinai to, umba wene nde anasine rai kai, weramu opamo indati kova no tawan weye Syo kovo nuge nuganui raunande ai. ²⁶ Muno vatano kova no so ara panave Rinai, wepamo weno nuge nuganui omamo siso rai ramu. Winyamo nyanave ayao Syo raura so rai rako?”

²⁷ Marta ama ayao mo raura mare, “Risyanave Injae winai, Winyamo Arikainyo Amisy muno

Mesias. Winyirati Injayo Amisye po natutir nde no mine so wepi Winy.”

Yesus poyov

²⁸ Marta mo ama ayao raurawa mewen, naije makato mo ama rijata Maria rawain muno mo ransamuabe nanto rai mare, “Injae Kurune pamo no no naisoa. Po nawain.” ²⁹ Maria mo raraniva jewen, umba mbeseo mavave nto no Yesusa nui.

³⁰ Arono naije, Yesus pana siso munijo namije rai rainy, yara no no unanuije raija nene, nai rati Marta nande aijoe. ³¹ Vatano Yahudi nanawirati wo Maria rayove no ama yavar wo raen mbe-seo mavave musyo. Weti wuruta utavondi rai, weye wo rakarae ware vemo moronto moyov no aipapo.

³² Maria muiya nanto Yesus nori muno mo aen, ama vukane ranteteraje no amun muno mo raura mare, “Injae, ranivara Winy no no naiso ratire, sya anakavo kakai ramu.”

³³ Arono Yesus po Maria raen moyov muno vatano Yahudi utavondi rai woyov tavon, anuga ranimaumbe muno mbe memembe rave. ³⁴ Naije Po manajo pare, “Nai rui rati wapo Lasarus augaveta antuna?”

Wo raura Yesus ai ware, “Injae, nde ramu Nyo raen.”

³⁵ Naije Yesus poyov.

³⁶ Weti vatano Yahudi wayao ware, “Waperata Opamo muiny dave irati Lasarus ai!”

³⁷ Weramu vatano Yahudi nanawije inta wo raura ware, “Po saumane raunanto vatano amije ntuba ai. Weti veanimaibe Po apa vambunine rave Lasarus apa kakai raorai jewen?”

Yesus po Lasarus aijaseo kovakato

³⁸ Yesus anuga ranimaumbe muno mbe memembe akato, weti to no aipapo. Aipapo namije mamu tinda ma, orame veano ama unsanda rauguji. ³⁹ Yesus payao pare, “Orame wato rajato ngkakavin.”

Weramu Lasarus napi kakai to so apa anamo Marta mayao akananto Yesus ai mare, “Weramu, Injae, sya anakavo Lasarus kakai apa masyote mambisy tami no aipapo rai. Indati apa kopa mandami ti ranavan!”

⁴⁰ Yesus po raura nanto Marta rai pare, “Umawe Syo raura kakavimbe nai to: syare ranivara nyanave, indati Amisy po apa kovo ntiti raro-ron.”

⁴¹ Weti wo orame umawe rajato ngkakavin. Yesus peraseo no naumo warae muno payao pare, “Kove raura akaore Sya Injayo Amisy winui weye Nyo ana Syo ranajo rarani to. ⁴² Syo raen anakotaro rui Syo ranajoeve mamu Injae nyo raraniv. Weramu vatano wanui rave soamo usayai inakijaniri, weti Syo sya sambaya so raura indamu wo ranaun ti wanave ware Injayo Amisy winyo inatutir.”

⁴³ Arono Yesus po ayao so raurawa mewen, naije gwain akoeve, “Lasarus, nyuje!”

⁴⁴ Naije kobe vatano kakai to napije puje. Aneme ajoe mamu ansune vasye ta mo rakepana nene muno ansune vasye rave amune rakepane mamu ta no tavona nene.

Yesus payao nanto vatano usayai no naije mansai pare, “Wapo apa ansune vasye rapaya ai indamu vemo panyawa nsaowave ai nora.”

*Vatano wanyinyaube indamu wo Yesus aubaisy
(Matius 26:1-5; Markus 14:1-2; Lukas 22:1-2)*

⁴⁵ Arono Lasarus kakaijoe, vatano Yahudi wanui ude wo Maria rapan, weti wo Yesus apa anapaporainye umawe raen kakavimbe, naije wanave Ai. ⁴⁶ Weramu vatane inta uta awa ayao nsiso irati vatano Parisi mansai, wo Yesus apa ana dave umaso raura tatugadi. ⁴⁷ Maisyare omai ti, vatano Parisi nawe, syeno akokoe nawe, akari akokoe Yahudi nawe wanugan indamu wayao rai. Ware, “Animaisye mirati wamo rave Vatane wato ai? Wepamo anapaporainyo manui rave Po raroron to. ⁴⁸ Ranivara wamo apaya vayave Po apa anakere so raija tutir, weamo indati vatan tenambe wanave Ai. Wea indati akarijo Roma uma be akarive wansai po apa naite matutir ude wo wama Yavaro Amisye randamisy muno wo wama susyo Yahudi mandamisy tavon.”

⁴⁹ Arono tumo naije, syeno titi apa tame mirati Kayapas. Po raura pare, “Weapamo wapan-tatukambe vintaboa! ⁵⁰ Muno wananta anakotare so raije ramu! Vatano Yahudi wangkakai vintabo omamo mamaisye ramu, yara vatane intabo kakaijo wansai tenambe wemi ngkov.”

⁵¹ Kayapas po ayaowe umaso raura, taune apa ana po ratantona mamu jewen yara nori rati Amisye ai. Weye Kayapas opamo syeno titi pije arono tumo naije, weti po raurairive pare indati Yesus kakai jirati vatano Yahudi mansai. ⁵² Muno indati kakaijo vatano Yahudi obo mansai ramu, yara indamu Amisye po apa arikainy una no munijo rui rui vayave no mine vone so manugan ti ube intabove.

⁵³ Arono naije kobe vatano Yahudi wanyinyaube indamu wo Yesus aubaisy. ⁵⁴ Maisyare omai ti, Yesus po aroron akato no vatano Yahudi wanui mansamun akato jewen. Po munijo Yudea rapaya nara poroto no munije inta ama tame Efraim, mararai no nugo vabukane vono maninimbe. Yesus muno Apa arakovo utavondi ai uta una no naije.

⁵⁵ Arono naije vatano Yahudi awa Ono Paska mararai kobe. Weti vatano Yahudi wanui una no munije raita wuruta no Yerusalem indamu wo manasine rarandom mamaisyo awa koane rai indamu ukakavin utavondi jirati Ono Paska rai. ⁵⁶ Wo Yesus akani, weti arono wanugan no Yavaro Amisy, wo manajo vambinibe ware, “Wapare Yesus indati de one so rai rako jewena rako? Animaisy e mi wapo ratantona?” ⁵⁷ Wo raura vambinibe tai maisy weye syeno akokoe muno vatano Parisi awa ayao rauguje to ware vatane inta po Yesus apa no raije raen, weamo to po raura mansai indamu wo aijar.

12

*Manine rauvaro Yesus ajo rai no Betania
(Matius 26:6-13; Markus 14:3-9)*

¹ Arono Ono Paska nande rainy, yara masyote kawije intabo ndento rati, naije Yesus to no munijo Betania. Lasarus, napirati Yesus po aijaseo kovakato, opamo nori rati Betania umaso. ² Weti munijo namije vatane wo anaisy e ratayao Yesus ai. Muno Marta omamo mo anaisy e raun mo raunande vatane mai. Lasarus opamo tavondi apa arakove mai wisyisyo Yesus atavon.

³ Naije Maria nde mo manino narwastu botorije inta raugav. Manine umaso mbovov muno ama mangke nseo rave. Umba Maria mo manine umaso rauvaro Yesus ajoe rai, muno mo rakarivuinye veano raupaisy. Weti manine umaso ranavan mbovove ntami jirati yavaro we rai tenambe.

⁴ Weramu Yudas Iskariot no no naije tavon. (Opamo ato siso Yesus apa arakove matavon muno wepirati kavinta pare po Yesus amavun.) Arono naije Yudas po raura pare, ⁵ “Wakoe! Manine uma wato ama mangke nseo rave!*” Weti veanimaibe mo rambayane jewen indamu ama doije raugav, wamo raunanto vatano awa ananuge meweno maije mai?” ⁶ Payao tai somaisy, weramu opamo aemeno vatano awa ananuge meweno maije mansai ramu. Yara beker po doije umaso rave taune amaram, weye opamo po Yesusa pe apa arakovo utavondi aije nawe awa doijo ranugane randi, weramu taune panaonoambe rai.

⁷ Weramu Yesus po raura Yudas ai pare, “Weinya! Mbemo nyo wanya so raura nora! Weye mo manine rauvaro Rinai indamu mo inanasine ratayao Sya masyoto inantuna raije rai. ⁸ Vatano awa ananuge meweno mai wenawamo una no wapa yasyine rai tutir. Yara Risyamo rino no wapa yasyine mamu ama masyote nggwaravainy

* **12:5** Manino narwastu botorije intabo ama mangke mi doije vasye 300. Arono nugo Roma wusyinoe, anakere ama doije veano ravae no taiso: anakero masyote intabo weamo doije vasye intabo ai, weti doije vasye nanto no 300 mare anakere rajara masyote 300 tavon.

akatoe ramu. Weti wanya so mare mo ana ngkove inta raunande Rinai masyoto unumeso, mo raunande kai.”

Vatano Yahudi manuga mamuno Lasarus ai indamu wo aubaisy

⁹ Vatano Yahudi wanui udaniv Yesus no no rai, weti wuruta no naije indamu wo akani. Weramu wo Yesus obo akani ramu, yara ware wo Lasarus aen tavon, wepirati Yesus po aijaseo kovakato no wene rai. ¹⁰ Syeno akokoe awa ayao intabo indamu wo Lasarus aubai tavon, ¹¹ weye wepirati bewaramo vatano Yahudi wanui wo awa syene mapaya yara wakata wanave Yesus obo ai.

Yesus aovambe no Yerusalem

(Matius 21:1-11; Markus 11:1-10; Lukas 19:28-38)

¹² Siman akato vatano wanui ude indamu utavono Ono Paska rai no Yerusalem. Vatano wanui umaso wo Yesus anaun panya ti de to. ¹³ Naije wo angkaji waowe raugav, mananibe wusya wo Yesus aovambe ware, “Amisye ararimbe!

Kove ngkov irati Napi de tamo Amisye rautane Ai!✧

Kove ngkov irati Akarijo Titi Israel ai!”

¹⁴ Yesus nanto keledai kamurame inta rai muno seo tuna rai, maisyare muno wusyinoe Ayao Amisye mo ratoea ntami to mare:

¹⁵ “Vatano Yerusalem,† wajani nora!

Waperata! Wapa Akarijo Titi pi de,

✧ **12:13** Mazmur 118:25-26 † **12:15** “Vatano Yerusalem” muno “vatano Sion” aya ine mamai kava, weye munijo Yerusalem ntami no Unato Sion rai.

seo tuna keledai kamuram inta rai!”☆

¹⁶ Arono naije Yesus apa arakovo utavondi ai nanawamo unanta ayao umaso rai jewen. Weramu arono Yesus kovakato ti seo pakato no munijo ntiti warae, naije umba mansaemen animaisye mirati vatano wanui wo rave Ai umawe rai, omamo Ayao Amisy mo raurairive ti ratoea ntami to.

¹⁷ Vatano wanui nanawirati utavondi arono Yesus po Lasarus awain puje aipapo rai muno Po aijaseo kovakato no wene rai, soamo wo Lasarus apa kovakato raura kakavimbe. ¹⁸ Wemi mbe-war ti vatano wanui wuje ra unande Yesus ai no unanui, weye udaniv Wepirati po anapaporainye umawe raroron to. ¹⁹ Weti vatano Parisi upari, wo rangkino taune mansai vambinibe ware, “Abo, waperata! Vatan tenambe uta utavono Yesus ai! Muno wamo mansopi kakai!”

Vatano Yunani inta wo Yesus akani

²⁰ Ono Paska umaso rai, vatane uta no Yerusalem indamu ube sambayambe. Muno vatano Yunani inta utavondi tavon. ²¹ Ude Pilipus ai muno wo raura ware, “Injae winy, reambeker wananta irati Yesus ai.” (Pilipus opamo vatano Betsaida no no Galilea.) ²² Weti Pilipus to po raura Andreas ai, umba yurija yo raura Yesus ai.

²³ Naije Yesus po raura pare, “Sya masyote nande to: kavinta rati umba Injayo Amisye pare po Arikainyo Vatan risya kovo ntiti raroron kakavimbe. ²⁴ Syo raura tugaive: Kasyambere kami intabo kai, ranivara avaya kopa rai jewen, weamo be intabove tutir. Yara intabo so avaya

☆ 12:15 Zakaria 9:9

kopa rai, indati po kami manui rauguje. ²⁵ Are pirati po apa kovo mine so bo ratantona, opamo indati apave kovo nuge nuganui raije ramu. Yara are pirati akirive taune apa kovo mine vone so rai, opamo indati apave kovo nuge nuganui rai. ²⁶ Are pirati pare panapatambe Rinai, weamo syare tavondi Inai indamu Sya tuna ri rui, opamo tuna inatavon. Vatano panapatambe Rinai pamo indati Injayo Amisye po apa tame rajaseo ntitive.”

Yesus po apa weno nde ai raura kakavimbe

²⁷ Yesus po raura nakato pare, “Soamo inanuga nseo majeve. Weti animaisye mi syare Syo raura? Indako Syo raura syare, ‘Injayo Amisy, Nyo siurijo nande so rapaya Rinai kai’? Vemo Syo raura taije maisy inya! Weye siuri so mirati mbewaramo ide no mine vone so. ²⁸ Injayo Amisy, Nyo nya kovo ntiti raroron kakavimbe!”

Naije kobe daniv anamote no no munijo ntiti ngkinde mare, “Tugae, Syo sya kovo ntiti raroron kakavimbe to, muno indati syare Syo raroron akato!”

²⁹ Vatano wanui usayai no naije wo anamoto namije raraniv. Wo raura ware, “Katitire mi ngkino we ndako?”

Weramu inta nawamo ware, “Oma jewena! Yara naito Amisye inta pi payao de Yesus ai!”

³⁰ Umba Yesus po raura mansai pare, “Amisye anamoto namije ngkino wasamarom indamu wapo ranaun. Yara ngkino rinamarome ma jewen. ³¹ Soamo masyoto mangke raugaje nande to, arono Amisye pare po mangke rapatimugo vatano mine so mansai. Muno pare Po Anakakai

Akoe, opirati be akarive mine so rai, awatambe pusyo. ³² Weramu Risyamo arono indati wo inaijaseo ti rino vombe irati mine so rai, weamo Syo vatan tenambe maugav ti wanave Rinai.” ³³ Yesus po raura taije indamu Po apa kakaijo sawa no inyo kapite rai raura wusyimbe.

³⁴ Vatano wanui nanawije wo raura Yesus ai ware, “Mbeanimaibe Nyo raura nyare wo Arikainyo Vatan aijaseo vombe no mine so rai ti kakai? Arikainyo Vatan napije pa are piye? Opamo Mesias we dako? Weramu reama Ananyao Musa mo ratoe mare Mesias opamo kova nuge nuganui, yara kakai jeben.”

³⁵ Yesus apa ayao po rasakinavo mansai pare, “Masyote kavinta vayave vare no wasarijat. Weti wapanya arono vare no wasarijat, indamu vemo wapakakave nora. Weye are pirati pare panya namane rai, opamo apa to rai mamu ngkaumudi weti pare toare rui. ³⁶ Risyirati inaurata irati vare so rai. Weti syare wapanave Rinai arono rino wasarijata nene so, indamu wasawainamo arikainyo var.”

Arono Yesus po ayao so raurawa jeben, puje ti poroto kokaibe mansai.

Veanimaibe vatano Yahudi wanave jeben

³⁷ Yesus po anapaporainyo manui rave raroron, weti vatano wanui wo raeno mamije rai, weramu wanave Ai ramu. ³⁸ Ana nande so mamaisyoy Ayao Amisy namirati anawae Yesaya po ratoe rai pare: “Amisyo winy, vatane wanave ayao reamo ravove raije jeben.

Muno unanta Amisy nya anapaporainyo nyo raro-
rone rai jewen tavon.”[✧]

³⁹ Ana mbewar ti vatano nanawije wanave
kakai, mamaisy irati anawae Yesaya po ratoe rai
tavon no taiso:

⁴⁰ “Amisye po raura pare,

‘Syo mansamije raveti ntuba

muno manuga raveti matu,

indamu vemo wo raeno mamije rai nora,

muno manuga nanto rai nora.

Wonayo usakinav wakare Rinaiji,

wemi mbewar Syo saumane raunande man-
saije ramu.’ ”[✧]

⁴¹ Ayaowe umaso Yesaya po raura weye po Yesus
apa kovo ntiti namije raen, weti po raura kakav-
imbe.

⁴² Arono naije, akarijo Yahudi wanui wanave
Yesus ai. Weramu wo awa wanave so raura
kakavimbe ramu, weye wo vatano Parisi
masyanivo wo mansaorai usisa no awa yavaro
sambaya rai. ⁴³ Wo vatane masyanive omamo
manakoe irati wo Amisye asyanive rakivan, weye
ubeke dave ware vatane umarinsembe mai.

Yesus po mangke rapatimu raura

⁴⁴ Umba Yesus gwaino anamoto manakoe rai
pare, “Vatano wanave Rinai onawamo wanave
Ribui inai jewen, yara wanave Injayo Amisy po
inatutire Ai tavon. ⁴⁵ Muno vatano wo inaeno
mamije rai, onawamo wo Amisyo po inatutire
aen. ⁴⁶ Ride no mine so maisyare vare ramaisy.
Are pirati panave Inai, weamo tuna kaumure ama
uga rai jakatoe ramu.

✧ 12:38 Yesaya 53:1 ✧ 12:40 Yesaya 6:10

⁴⁷ Yara vatano wo Sya ananyao raraniv weramu utavono rai jewen wenawamo Syo mangke raugaje mansai jewen. Weye ride indamu Syo mangke raugavo vatano mine so mai jewen, yara Risya ide mamu indamu Syo vatano mine so mapaya awa ayao kakaije rai. ⁴⁸ Weramu vatano are pirati po inatugaro marambe muno po Sya ayao raranive jewen, opamo indati mangke rapatimugo ai arono munije ama akari. Mangke rapatimugo ai weye ponae Sya ananyaowe rai. ⁴⁹ Weye Risya ananyao syo raura mamu muje no taune Rinai ma jewen, yara Injayap apa ma. Wepirati po inatutir weti ide, weti animaisye mirati pare Syo raura, wemamu Syo raura kobe. ⁵⁰ Muno Syo raen Amisye apa ananyao mamu mo kovo nuge nuganuije raunande. Weti ana rui mirati Syo raura omamu mamaisy irati Injaya apa ana po raura Rinai bo rai.”

13

Yesus po apa arakovo utavondi ai majo raron-dom

¹ Masyote intabo akato sisa irati Ono Paska rai. Arono naije Yesus po raen Apa masyoto de no mine so ama marane nde nande indamu puje mine so raora, pakato no Ajaya nui. Muiny irati Apa kawasae una no mine so mansai, muno muiny irati mai tutira ntoa ama marane rai.

² Yesus muno Apa arakove wisyisy no naman. Muno Yudas, opamo Simon Iskariot apa kavo pije, tavondi. Weramu Anakakai Akoe apa bekero ngkakai nsiso Yudas anuga rai to indamu po Yesus

amavun. ³ Yesus po raen Ajayo Amisy po vambunine raunande Ai indamu be akarive anakotare rai tenambe. Po raen tavon Wepamo no no Amisy nui ti de no mine so muno kavinta pakare no Amisye nui. ⁴ Maisyare omai ti, seo tet kobe Po apa ansuno manawadi raugaje muno Po andukije inta rave atiririje raweyae. ⁵ Naije Po mana rauvaro ugane inta rai muno Po apa arakovo utavondi aije majo rarandom muno Po apa andukijo uma po rave atiriri raweyae we veano mana raupaisy ngkangkaman.

⁶ Arono Simon Petrus apa varoro Yesus po ajo rarondome rai, naije po raura nanto Yesus ai pare, “Injae, nyare Nyo inajo rarandom tavona e?”

⁷ Yesus po apa ayao raura ai pare, “Soamo winanto ana Syo rave so ama ine rajje ramu, yara indati masyoto makare umba winanto rai.”

⁸ Petrus po raura akananto Ai pare, “Injae, wenora! Mbemo Nyo inajo rarandom inya! Mамaisyae ramu!”

Yesus po apa ayao raura ai jakato taiso: “Ranivara Syo najo rarondome jewen, weamo winyamo Sya arakovo tavondijo rinai pi winye jewen.”

⁹ Umba Petrus po raura pare, “Maisyare omaisyamo, Injae, inajo bo rarandom weamo nsopi nora, yara inanem muno inakari ntenambe!”

¹⁰ Yesus po raura akananto ai pare, “Vatano po mana rayajam opamo kakavimbe tenambe, weti vemo po ayajam akato nora, yara ajo bo rarandom ngko kai. Weti weapamo wakakavimbe, weramu vatane inta no no wapa yasyin

kakavimbe jewen.” ¹¹ Yesus po vatano pare po amavune aen to. Wemirati mbewaramo Po raura pare, “Weapamo wakakavimbe, weramu vatane inta no no wapa yasyin kakavimbe jewen.”

¹² Yesus po majo rarondoma jewen, naije Po apa ansuno manawadi raugakasya Ai muno seo tuna nakato. Umba Po raura akananto mansai pare, “Weapamo wananto Sya ana syo rave wasai kavoe raija rako? ¹³ Weapo inawainamo Kurun muno wapa Akari. Wapo inawaine somamo maisy weye tugae Risyamo wapa Kurune muno wapa Akari pi Risy. ¹⁴ Risyi wapa Akari muno wapa Kurun syo wasajo rarondom, weti syare weapamo wapo rinamaisy indamu wapo taune wasajo rarondom vambinibe. ¹⁵ Sya ana syo raijaro wasai so mbe unanuive wasai, indamu weapo raijaro wasai vambinibe maisyare muno Risy ramaisy. ¹⁶ Syo raura tugaiwe: Vatano panapatambe apa akarije ai opamo panakoe po apa akarije akivane ramu. Muno vatano akarije po atutire opamo panakoe po apa akarije akivane tavone ramu. ¹⁷ Soamo weapo Sya ananyaowe so raen to, weti ranivara wapo raijaro rarijati, weamo kove ngkov irati wasai.”

Yesus daura to pare indati vatane inta po amavun

(Matius 26:20-25; Markus 14:18-21; Lukas 22:21-23)

¹⁸ “Sya ayao syo raura somamo indati Syo wasaura tenambe ma jewena. Syo wasaen tenambe, weye Syo wasapatimu to. Weramu vatane inta no no wapa yasyin anuga ngkakaijo

Rinai, indamu mamaisyo Ayao Amisye mo raurairive rai no taiso:

‘Vatan inta wepirati pisyisyo inatavon, opamo indati marovave Inai.’[☆]

¹⁹ Ayao namije mamamo ama masyote nde nande rainy, yara Syo raura wasai wusyimbe rati. Weaveti arono indati nde nande to, syare wapo raen Sya urairi mo ramai dave, naije wapare, ‘Mesiasa pi so.’ ²⁰ Syo raura tugaive: are pirati bekobe irati vatano Syo atutire ai, opamo maisyare bekobe irati Rinai. Munno are pirati bekobe irati Rinai, opamo maisyare bekobe irati Sya Injajo po inatutire Ai tavon.”

²¹ Yesus po ayao umaso raurana mewen, umba anuga nseo maje, naije Po raura pare, “Syo raura tugaive, wepamo indati inta nyo inamavun nanto Sya marova mansai.”

²² Arakovo utavondi Ai upaparo mansai, weti wo mansami ranyanyut tutudi weye wantatukambe are pirati Yesus po aura so.

²³ Arono naije arakovo napirati Yesus anuga no ai rave tuna pangkepano Ai.* ²⁴ Simon Petrus po aneme veano arakove umaso angki indamu po Yesus anajo are pirati Po aura so.

²⁵ Weti arakovo napi pangkepano Yesus ai umaso po anajo pare, “Injae, are pirati Nyo aura umaso?”

²⁶ Umba Yesus po raura akananto pare, “Vatano Syo rotije rayansundi ti Syo raunanto po raisy, wepirati napije to.” Naije Yesus po roti nako

[☆] **13:18** Mazmur 41:9 * **13:23** Arakovo Yesus anuga no ai rave wepamo Yohanes.

raotare inta raugav muno Po rayansundi Po rauranto Yudas ai, opamo Simon Iskariot apa kavo pije. ²⁷ Arono Yudas po anaisyo Yesus po raurande raija to, naije kobe Anakakai Akoe siso anuga rai.

Naije Yesus po raura nanto Yudas ai pare, “Nyavave, anakotaro nyare nyo rave mamo nyo rave riye.” ²⁸ Weramu vatano utantuna wisisyo Yesus atavon inta nanto irati Apa ayao po raura nanto Yudas ai umaso raije ramu. ²⁹ Inta nawamo wo rakarae ware vemo Yesus po Yudas atutir indamu po anakotare inta ramavuno one so rai. Indako jewenamo Yesus po atutir indamu po doije inta raunanto vatano awa ananuge meweno maije mansai, weye Yudas wepirati po arakove awa doije randi.

³⁰ Arono Yudas po rotije raija to, naije panawadi pusyo kobe. Namane nde to.

Yesus po ananyao wanyine raunande

³¹ Arono Yudas pusyo to, Yesus po raura pare, “Kavinta rati Amisyé po Arikainyo Vatane risya kovo ntiti raroron kakavimbe, muno ana indati nande Rinai mo Amisyé apa kovo ntiti raroron.

³² Syo Amisyé apa kovo ntiti raroron, weamo Amisyé pavave po Risya kovo ntiti raroron.

³³ Sya arikainye weap, Risyamo ino akato wasarijata masyote nggwaravainy akatoe ramu. Weapamo indati wapo inakani, weramu munijo syoroto rai, weapamo indati wata rai kakai. Syo ayao so raura wasai maisyare muno umawe Syo raura akarijo Yahudi mansai to.

³⁴ Ananyao wanyin Syo raurade wasai mi so: Wamuiny irati wasai tutudi. Maisyare rimuinyo wasai, maisyare omai tavon weapamo wamuinyo wasai vambinibe. ³⁵ Ranivara weamuinyo wasai tutudi, naije vatan tenambe wo wasaen ware weapamo vatano watawondi Rinai.”

Yesus daura to pare Petrus indati po amamarave

(Matius 26:31-35; Markus 14:27-31; Lukas 22:31-34)

³⁶ Simon Petrus po Yesus anajo pare, “Injae, nyare nto no rui?”

Yesus po raura akananto ai pare, “Risya munijo syoroto rai soamo Winyamo ntavondije ramu. Weramu masyoto rijate indati wintavondi Inai jaje.”

³⁷ Simon Petrus po raura akato pare, “Injae, mbeanimaibe nyare soamo risya tavondi Nai jewen? Risyamo indati syo inanasine raunandea ikakai natavon!”

³⁸ Yesus po apa ayao rasakinav akananto ai pare, “Nyare winanasine raunande ti ngkakai rinatavon, weramu Syo raura tugaive: namane so mangkuere pana kokebe rainy, indati winyo inamamaravea susye mandei!”

14

Yesus wepirati be unanuive wansai indamu wanta Injayo Amisye ai

¹ Yesus po raura pare, “Wabemo wasanuga ma-maun inya. Wapanave tawano Amisye ai; syare wapanave tawano Rinai tavon. ² Sya Injaya apa yavare mamu ama tanoano ta na rai manui rave.

Risyoroto indamu Syo Injaya apa yavare ratayao wasanyut. Sya ayao syo raura so no rai tugae; syangkarive ramu. ³ Arono syusya to Syo tanoane ratayao wasanyut, Risyamo indati syakare Syo wasaugav, indamu rui rati rito nori, weapamo wano rai tavon. ⁴ Weti unanuijo Syo raito no munijo Syo ratayao wasai omamo weapo raen tavon.”

⁵ Umba Tomas po raura Yesus ai pare, “Injae, Nya nto rai mammo reamantatukambe rai. Weti unanui Nyo raito mammo nyare indati reamo raen tai rui?”

⁶ Yesus po raura kakavimbe pare, “Risyrati unanui nto no Injayo Amisye nui; muno Risyrati sya ayao mamai tugae; muno Risyrati syo kovo nuge nuganuije raunande vatane mai. Ribui syirati unanuijo vatane uta no Injayo Amisye ai. ⁷ Ranivara weapo rinaen tugaive, weamo weapo Sya Injaya aen tavon to ije. Tugae, wapo rinaen to, weti soamo wapo Injayo Amisye aen dave muno wapo aeno wasanuga rai.”

⁸ Pilipus po raura nanto Yesus ai pare, “Injae, Nyo Amisye aroron indamu reamo aen dave, wea umba reamare mamai dave reansai to.”

⁹ Weramu Yesus po raura akananto ai pare, “Pilipus, nugoenta rave to ituna wasatavon, weramu nyantatukambe Rinai. Vatano po rinaeno amije rai, weamo po Injaya aen to ije. Weti mbeanimaibe nyo raura nyare Injayo Amisye aro-rono wasai? ¹⁰ Risyamo ino intabove no Injayo Amisye ai muno Injayo Amisye no intabove Rinai. Pilipus, syo ratantona winyanave ayao umaso rai kobe rainy. Sya ayao syo raura nai omamo ayao

no taune Rinai vayave jewen. Yara Injayo Amisy, Wepi no tawan intabove no Rinui, Po raugaje inda Syo raura. Muno Sya ana syo raijar omamo Amisye wepi po raugaje inda Syo raijar. ¹¹ Syare wapanave Sya ayao so rai: Risyamo ino intabove no Injaya nui muno Injaya pamo no intabove Rinai. Yara jewenamo, syare wapanave Rinai weye Syo anaporainye manui raroron to.

¹² Syo raura tugaive: vatano are pirati panave Rinai opamo indati po Sya anakero ridaija to, raija tavon. Muno opamo apa anakero daijare ma indati mo Sya rakivan, weye Injayo Amisye po vambunine raugaje ai weye risyakato no Injaya nui. ¹³ Muno anakotaro rui vayave wapo ranajo Rinai muno wapo Sya tame veano raokae, indati Syo raugaje wasai kobe, wirati indamu Risy Arikainyo Amisy syo Injaya apa kovo ntiti raroron kakavimbe. ¹⁴ Anakotaro rui wapo ranajo muno wapo Sya tame veano raokae, Syo raugaje mamaisyo wapo ranajo rai kobe.”

Yesus po Amisye apa Anawayo Vambunine raurairive

¹⁵ “Ranivara weamuiny irati Rinai, weamo weapo Sya ananyao syo raugaje rarijat. ¹⁶ Indati Risyo Injaya anajo indamu Po Anawayo Vambunino mo inanigwane raugaje wasai indamu Mo wasaeranande muno ntuna wasautana nuge nuganui. ¹⁷ Anawayo Vambunino namije mo Amisye apa ayao tugae obo raura. Vatano mine so wonayo Anawayo Vambunine rai weye wenawamo wo raeno mansamije rai ramu muno wantukambe

Rai. Weramu weapamo wapo raen weye ntuna wasautan muno no tawan no wasanuga rai.

¹⁸ Weapamo Syo wasapaya watantuna arikainyo vavabe ramu. Yara Risyamo syakare wasai. ¹⁹ Masyote nggwaravainy akatoe ramu, yara kavinta vayave indati vatano mine so mo inaien akatoe ramu. Weramu weapamo wapo inaien akato. Risyamo ikova no tawan. Maisyare omai ti, Syo kovo nuge nuganuije raugaje wasai indamu weapamo wakova no tawan tavon. ²⁰ Arono naije indati wapo raen kakavimbe: ino intabove Injaya ai, muno weapamo wano intabove Rinai, muno rino intabove wasai.

²¹ Vatano wo Sya ananyao raraniv muno wo rarijat, wenawirati muiny irati Rinai. Muno vatano umuiny irati Rinai, vatano nanawije Injayo Amisyen muiny irati mai. Muno Risyamo rimuiny irati mai tavon muno inaroron kakavimbe irati mai.”

²² Umba Apa arakove inta apa tame mi Yudas (Yudas Iskariot wepi so pa jeben). Yudas napiso po Yesus anajo pare, “Injae Yesus, veanimaibe nyare winaroron kakavimbe reansai, yara vatan tenambe mine so mansai jeben?”

²³ Yesus po raura kakavimbe mansai pare, “Vatano muiny irati Rinai opamo po Sya ananyao rarijat. Indati Sya Injaya muiny irati ai. Injaya muno Risy irinde ai muno irimintantuna irati vatano napije autan. ²⁴ Vatano muinyo Rinai jebene nanawamo ubeta Sya ananyao raije ramu. Ananyao namije mamu no no taune Rinai mamu jeben, yara no no Injayo po inatutire Ai.

²⁵ Arono ta Risye wana tenambea nene so, Syo ayao so raura tenambe wasai. ²⁶ Weramu Anawayo Vambunin, namirati Injayo Amisye po raurande wasai indamu Mo inanigwan, Wemirati mo wasaerande muno Mo wasanyao anakotare rai tenambe. Omamo no wasautan indamu vemo wasanimari Sya ananyao syo raugaje wasai rai jinya, yara wasaemen dai tenambe. ²⁷ Vemo wasanuga mamaun nora muno wajani nora. Saumane mammo Syo raugaje ntuna no wasanuga rai, taune Risya saumano syo raunande. Saumano namije mammo mo mine so ama mo raunande ramaisye ramu.

²⁸ Risya ayao syo raura mammo weapo raranivo Inai to syare, 'Indati syoroto, weramu indati syakare wasai.' Arakove, ranivara weamuinyo Inai, weamo wasanayanambe Risya syoroto so rai, weye syakato no Sya Injaya nui, wepirati panakoe rinakivan. ²⁹ Ayao namije mammo ama masyote nde nande rainy, yara Syo raura wasai wusyimbe rati. Weaveti arono indati nde nande to, syare wapo raen Sya urairi mo ramai dave, naije wapanave Rinai.

³⁰ Syo raura wasaija nggwaravainy akatoe ramu, weye Anakakai Akoe pavave de. Wepi be akarive mine so rai, weramu opamo be akarive Rinai jeben. ³¹ Yara ana indati nande Rinai mammo indamu vatano mine so wo raen Risyamo rimuiny irati Injayo Amisye ai muno Apa ana po inatutir indamu Syo raijar omamo Syo raijar tenambe, yara Syo inta rawatambe ramu.

Yombe, Sya arakove. Kova to! Wade ramu wanta.”

15

Yesus aurata irati anggurije ama mote rai

¹ Yesus po taune aura kakavimbe akato pare, “Risyrati inaurata irati anggurije ama moto ngkove rai, wemi man dave. Muno Sya Injaya wepirati be akarive nawaisyo angguri umaso rai. ² Risya aneme inta mare ama mane meweno rai, weamo Injaya po raotar. Yara anemo rui mirati ama mane no rai, weamo ama wao inta ratondomo indamu ngkakavino rai indamu ama mane makauje rai ti manui rave. ³ Weapamo wakakavimbe, weye Syo sya ananyao raugaje wasai mo wasanuga ratayaowa ngkakavimbe to. ⁴ Syare wana tawan intabove no Rinai muno Risyamo ino tawan intabove wasai tavon. Anggurije aneme inta mare mpatimu ti no mumuimbe, weamo ama mane meweno rai, yara aneme no tawan no anggurije ama mote rai, weamo man dave. Maisyare omaisy wea tavon, ranivara weapamo wano tawan no Rinai jewen, weamo wapa ana wadave ti ngkove mewen.*

⁵ Risyrati inaurata irati anggurije ama mote rai muno wepirati wasaurata anggurije ama aneneme rai. Are pirati no tawan no Inai muno rino tawan no ai, indati apa ana dave ngko dave mamomanui. Weramu wana tawan no Rinai jewen, weamo wapa ana wadave ti ngkove ma

* **15:4** Yesus po raura ananeneaebe so. Mane raurata irati ana wandave ti ngko dave rai. Weti arono wana tawan intabove no Yesus ai, wama ana wandave ngko dave. Weramu wamare wamo Yesus apaya ti wamanya mumuimbe, weamo wama ana wandave ngko dave mamomeweno wansai.

mewen. ⁶ Are pirati no tawan no Inai jewan, indati Syo amaugo marambe maisyare angguriye ama anemo ngkanen. Anenemo ngkanen omamo indati ranugande intabo ramaugo taname rai, taname mo ranena mangkur. ⁷ Weramu ranivara weapamo wano tawan no Rinai muno wapo Sya ananyao raija matuve no wasanuga rai, weamo wapa anakotaro rui wapo ranajo Injaya ai omamo Po raugaje wasai jaje. ⁸ Muno weapa ana wadave ngko dave mamu manui, wea indati vatano kaijinta wo raen ti wo wasaura ware, 'Sonawamo utavondi Yesus ai.' Wea umba wo Injayo Amisy ararimbe.

⁹ Maisyare Injayo Amisy muiny irati Rinai, maisyare omai tavon Risyamo muiny irati wasai. Weti syare weapamo wano tawan no Rinai indamu Sya muinye no irati wasai tutir. ¹⁰ Weabeta Sya ananyaowe rai, weamo indati wano tawan no Rinai muno Sya muinye no irati wasai tutir, maisyare muno ribeto Sya Injaya apa ananyaowe rai ti ino tawan no Ai muno Apa muinye no irati Rinai tutir. ¹¹ Anakotare so Syo raura wasai tenambe indamu wasanayanambe maisyare taune Risy inanayanambe. Syare wasanuga ranayanambe rave.

¹² Risy ananyao syo raugaje wasai no taiso: Syare wamuiny irati wasai tutudi maisyare muno rimuinyo wasai. ¹³ Are pirati po anasine raudandea kakai indamu po apa arakova mapaya kakaije rai, opamo apa muinye manakoe rave, mo muinyo kaijinta rakivan. ¹⁴ Weapamo wabeta Sya ananyao syo raugaje wasaije rai, weamo Syo wasawainamo Sya arakov. ¹⁵ Soamo Syo wasawaino

vatano wapanapatambe wemaisy akatoe ramu, weye vatano wanapatambe nawamo awa akari po apa ana po raveye raura mai tenambe jeben. Weramu soamo Syo wasawainamo Sya arakov, weye ana Syo raraniv no Amisy ai omamo Syo raura wasai vintabo. ¹⁶ Weapirati wapo inapatimu jeben, yara Risyirati syo wasapatimu. Muno Syo wasapatimu indamu wata wapo ana wadave ngko dave raijar. Umba wapa ana wadave ama kove raumandije ramu, yara no tawan. Arono naije anakotaro rui vayave wapo ranajo Injajo Amisy ai muno wapo Sya tame veano raokae, indati Po raunande wasai jaje. ¹⁷ Risyia ananyao syo wasatutiro rai mi so: Wamuiny irati wasai tutudi.”

Vatano mine so manuga mamuno Yesus apa arakove mansai

¹⁸ “Ranivara vatano mine so manuga mamuno wasai, weamo syare wasaemen: Risyirati manuga mamuno Rinai wusyimbe. ¹⁹ Are nawirati utavondi ananyao mine so rai, weamo vatano mine so ubekobeo mai weye wo mansamaisy. Weramu weapamo watawondijo mai jewena, weti manuga mamuno wasai. Syo wasawain ti wapuje vatano nanawije mansaora to, wemi mbewar manuga mamuno wasai. ²⁰ Wasaemen irati Sya ayao syo raura wasaijoe rai syare: ‘Vatano panapatambe apa akarije ai opamo panakoe po apa akarije akivane ramu.’* Maisyare omai ti, ana rui mirati vatane wo rave nande Rinai to, wemirati indati wo rave nande wasai tavon. Vatane wo arare veano rinave to, weti indati

* 15:20 Yohanes 13:16

wo arare veano wasave tavon. Yara vatano kaijinta ubeta Sya ananyao rai to, weti indati ware ubeta wapa ananyao rai tavon. ²¹ Vatano mine so wantatukambe irati Injayo Amisy wepi po inatutire Ai. Maisyare omaisy, ware wo wasave tatugadi weye wapanave Rinai.

²² Ranivara ride Syo vatano mine so mansanyao jewen datire, weamo Amisye pariyo awa ayao kakai raije ramu. Weramu soamo ride Syo mansanyaube to, weramu wonae wanavei, weti Amisye po awa ayao kakai rapaya ramu. ²³ Are pirati anuga mamuno Rinai, weamo anuga mamuno Sya Injaya ai tavon. ²⁴ Sya anapaporainyo syo raroron no awa yasyine rai omamo manakoe, vatano kaije wo rarorone ramu. Ranivara Syo anapaporainye umaso rarorone jewen datire, weamo Amisye pariyo awa ayao kakai raije ramu. Weramu vatano nanawije wo Sya anapaporainye umaso raen to, weramu mansanuga mamuno Risye sya Injaya pe ririnsai. ²⁵ Anakotare umaso nande indamu mamaisyo Ayao Amisy mo ratoo no taiso:

‘Risya ayao kakai mewen irati Rinai,

weramu manuga mamuno Rinai vayave.’[☆]

²⁶ Indati Risyo Anawayo Vambunino no Injayo Amisye ai ratutir nde Mo wasaeranande. Wemirati no no Injaya ai umba nde Mo Apa ayao tugae raura. Arono nde nande to, indati Mo rinaura kakavimbe. ²⁷ Muno weapamo indati wapo rinaura kakavimbe tavon, weye weapamo wana rinatavon arono manasyin kobeyoe Syo Amisye apa anakere rajjar nde ava unumeso.”

[☆] 15:25 Mazmur 35:19, 69:4

16

¹ “Syo anakotare umaso raura kakavimbe wasai to indamu arono anakotaro ngkakai nande wasai, vemo wapa anave Rinaije mpatimu nora. ² Weye indati vatane wo wasaorai wasisa no yavaro sambaya rai. Muno masyoto makareye vatane inta wo wasaubaisy, umba wo rakarae ware wo wasaubaisy somamo awa wanapatambe Amisye ai mije. ³ Wo wasave tatugadi tai somaisy weye wantatukambe Injayo Amisye ai muno wantatukambe Rinai tavon. ⁴ Syo raura kakavimbe wasai indamu arono anakotaro ngkakai so mare nande wasai, wasaemen Syo raura wusyimbe to.”

Yesus po Anawayo Vambunin ama anakere raura

“Manasyinoe Syo anakotare umaso raura wasai ramu weye taune rino wasarijata nene. ⁵ Weramu soamo syare ito no Sya Injayo wepi po inatutire Ai. Muno weapamo inta nyo Sya to raije ranajobe ramu. ⁶ Yara wasanimaumbe rave weye Syo raura syare syoroto. ⁷ Weramu ana tugae mammo Sya syoroto mammo ngkov irati wasai. Weye ranivara syoroto jewen, weamo Anawayo Vambunino mo wasaeranande indati nde wasai jewen. Weramu ranivara syoroto, indati Syo ratutir nde wasai.

⁸ Anawayo Vambunin nde toyamo, indati Mo vatano mine so mauga ti wo taune awa ayao kakaije raen. Mo raura mansai mare awa ayao kakaije ntapekan ti umamai no Amisye amune rai jewen, weti indati Po mangke raugaje mai. ⁹ Mo raura mare vatane wanave Rinai jewen omamo

ayao kakaije mije. ¹⁰ Muno mare Ribuisy ma-maisyo Amisye amune rai, weti syakato no Injayo Amisye ai muno wapo inaen akatoe ramu. ¹¹ Muno Mo mangke raura kakavimbe mare Amisye indati po mangke raugaje Anakakai Akoe ai, wepirati be akarive mine so rai.”

¹² Umba Yesus po raura akato pare, “Risya ayao syare syo raura wasai manui ta noa nene, weramu weapamo wananta rai rainy. ¹³ Arono Anawayo Vambunin nde toyamo, indati Mo Amisye apa ayao tugae raura kakavimbe indamu wananta rai tenambe. Taune Ama ayao mo raura ma jewena, yara ayao Mo raraniv no Injayo Amisye ai wemi Mo raura. Muno anakotaro indati nande wemirati Mo raura kakavimbe. ¹⁴ Mo ama ayao raugav no Rinai, umba Mo raura wasai. Maisyare omaisy, Mo inaijaseo titive ti vatane wo inararimbe. ¹⁵ Anakotar tenambe Injayo Amisye apaura rai omamo risyaura rai. Wemi mbewar Syo raura syare ayao kotaro Anawayo Vambunine mo raura wasai mammo Mo raugav no Rinui.”

Arakove manimaumbe wusyimbe indati man-anibe

¹⁶ Naije Yesus po raura nanto Apa arakovo utavondi ai mansai pare, “Kavinta wapo rinaene jeben, umba kavinta nakato wapo inaen akato.”

¹⁷ Apa arakove wo araniva jeben, naije wayao vambinibe ware, “Yesus apa ayao kavoe po raura ama ine no tai rui? Pare, ‘Kavinta wapo rinaene jeben, umba kavinta nakato wapo rinaen akato.’ Muno pare, ‘Risiamo syoroto no Injaya nui’?!”

¹⁸ Payao pare, ‘Kavinta,’ weramu ayao so ama

ine no tai rui? Reamamo wamantatukambe Apa ayaowe rai!”

¹⁹ Yesu po manuga raen ware wo ana inta ranajo Ai. Weti Po raura mai pare, “Wapo wasanajo vambinibe Sya ayao umawe rai rako? Umawe syare, ‘Kavinta wapo inaene jewen, umba kavinta nakato wapo inaen akato.’ ²⁰ Syo raura tugaive: weapamo indati wapoyova wabe memembe, weramu vatano mine so onawamo indati mansanayanambe. Weapamo wasani-maumba, weramu indati mo ranigwan akato mamu wasananibe. ²¹ Ranivara wanya inta mararai mo ama arikainye avaki, wanya so ran-imaumba weye ama masyoto ama siuri rau-nande rai nde rai. Weramu arikainye avakija kakavin to, ama siuri umawe rakanive rai vintabo weye rananibe ama arikainye ai mo avaki to. ²² Maisyare omaisy wea tavon: Soamo wasan-imaumba, weramu indati syakare Syo wasaen akato. Arono naije wasananibe akato, muno wasananibe somamo vatane inta po raugavo wasaora kakai.

²³ Arono masyoto namije nande wasai, wapo anakotare ranajo Rinai jakato jewen. Syo raura tugaive: anakotaro rui vayave wapo ranajo Injajo Amisy ai muno wapo Sya tame veano raokae, indati Po raunande wasai jaje. ²⁴ Ndea unumeso wapo Sya tame veano wapa sambaya raokae jewen. Weramu naisoamo syare wapo Sya tame veano raokae, wea umba Amisy po wapa ana wadanajo raunande wasai indamu wasananibe rave.

²⁵ Sya ayao syo raura umawe mbe ananeneaebe

wasai. Weramu ama masyote mare nde nande, arono naije ananeneae mamu Syo inta raura akato jeben, yara syanawadi Syo Injaya aura kakavimbe wasai. ²⁶ Arono naije indati wapo Injaya anajo, muno wapo Sya tame veano raokae. Risyamo syo ranajo Injaya ai wasamarome ramu. ²⁷ Injaya apa muinye manakoeyo wasai weti wapanawadi wapo anajo kai. Injayo Amisye muiny irati wasai weye weamuiny irati Rinai muno wapanave Rinai wapare risyamo tugae rino no Injayo Amisye ai umba ide. ²⁸ Tugae, rino no Injaya ai umba ide mine so rai to, weramu soamo Syo mine so rapaya syakato no Injaya nui.”

²⁹ Naije Yesus apa arakove wo raura Ai ware, “Injae, soamo Nyo ananeneae rapaya ti Nyo raura kakavimbe to. ³⁰ Soamo reandaen Nyo anakotar tenambe raen kobe. Reamare reamo nanajo ana inta rai weamo jeben kai, weye Winyamo nyo reansanuga raen to! Nyo anakotare raen tenambe, weti reamanave tugae Winyamo no no Amisye ai umba nde.”

³¹ Yesus po raura akananto mansai pare, “Soamo wapanave to rako? ³² Weramu Syo raura wasai: Masyote nggwaravainy akatoe ramu yara soamo nde to arono weapamo indati wapandamisy, ti wanajiv no taune wapa yavare rai tutudi muno wapo inapaya ti Ribui no. Weramu Ribui no jeben, yara Injaya pe irina kava.

³³ Anakotare umaso Syo raura wasai to indamu vemo wasanuga mamaun nora, yara Syo kovo saumane raugaje wasanuga rai. Wana no mine so rai, wasiuri weye vatane wo wasave

tatugadi. Weramu wabemo wajanimv nora, yara wasatawandi! Risyo mine so ama vambunino ngkakainoanive rapinde to!”

17

Yesus be sambayambe Amisye ai

¹ Yesus po apa ayao umawe raurawa mewen, umba peraseo no naumo warae muno payao to Injayo Amisye ai pare, “Injae, masyoto Nyo rapatimu soamo nde nande to. Maisyare omai ti, syare masyoto unumeso Nyo Nya Kavoy risyamo sya kovo ntiti raroron indamu Syo Nya kovo ntiti raroron tavon. ² Weye Nyo vambunine raunande Nya Kavoy rinai to indamu ibe akarive vatano mine so mansai tenambe. Wirati Sya kawasae nanawirati Nyo mansaunande Rinai onawamo Syo kovo nuge nuganui raunande mansai tenambe. ³ Vatano awave kovo nuge nuganuije rai onawamo vatano nanawirati wo Injae naen Wibuin nyirati Amisyo tugae, muno wo Risyi Yesus Kristus inaen tavon, Risyi Nyo inatutir. ⁴ Syo Nya kovo ntiti rarorombe mine so rai tenambe to weye Syo Nya anakero nyo raugaje Inai rajara mewen to. ⁵ Injae Amisy, kavinta syakare no Winui jakato. Syare Nyo Sya kovo ntiti raunande Rinai jakato, wemirati risyaura rai arono munije so ranari rainy.”

Yesus be sambayambe Apa arakovo utavondi ai mansai

⁶ “Injae, arakove sonawamo manasyinoe utavondi mine so ama bekere rai. Weramu winyaura mai muno Nyo mansaunande Rinai indamu utavondi Rinai. Syo winarorono mansai

to muno ubeta Nya ayao rai to. ⁷ Soamo wo raen anakotaro rui Syo rave no mine so, Injae winyamo nyo ama vambunine raunande Rinai. ⁸ Weti ayao ndaunande indamu Syo raura mansai omamo Syo raura to, muno wo raija to. Wo raen tugaive Risyamo ino no Injae winai umba ide muno wanave Winyirati nyo rinatutir ide mine so rai.

⁹ Ibe sambayambe vatan tenambe mansai jeben. Yara ibe sambayambe arakovo Nyo maunande Rinai mansai, weye wenawirati nyaura mai. ¹⁰ Onawamo wo Sya kovo ntiti raroron kakavimbe. Anakotar tenambe syaura rai mamo Injae nyaura rai tavon. Muno anakotaro nyaura rai mamo syaura rai tavon.

¹¹ Soamo ide no Winui. Risyamo ino akato no mine so raije ramu, weramu Sya arakove so una tawan no mine so rai. Injayo Amisy kakavimbe winy, syare Nyo Sya arakove so maeranande Nya tame ama vambunine rai, wemirati tamo Nyo raunande Rinai. Syare Nyo maeranande indamu wenanawamo ube intabove, maisyare Winy muno Risy irimamo rimbe intabove tavon.

¹² Arono Risyamo ta rino sya arakove so marijat, Syo maeranande Nya tame ama vambunine rai, tamo Nyo raunande Rinai. Syo maeranande weti inta aumandi jeben. Weramu watano napirati Amisy winyo apatimu indamu kakai wepamo indati aumandi kobe inda mamaisyo Ayao Amisy mo raurairive rai.*

¹³ Soamo ide no Injae winui. Syo sya ayao raugaje Sya arakove mai arono ta ino no mine

* **17:12** Vatane sopamo Yudas Iskariot.

vone so rai indamu manayanambe rave maisyare muno inanayanambe. ¹⁴ Risyo Nya ayao raugaje Sya arakove so mansai to. Weti vatano mine so manuga mamuno mai, weye wenawamo utavondi mine so ama bekere raije ramu, maisyare muno Risyamo ritavondi mine so ama bekere raije jewen tavon. ¹⁵ Risyo nanajo indamu Nyo arakove so maugavuje mine so raora omamo jewen. Yara Syo nanajo indamu Nyo mansavijuri jirati Anakakai Akoe ai. ¹⁶ Onawamo utavondi mine so ama bekere raije ramu, maisyare muno Risyamo itavondi raije jewen tavon. ¹⁷ Injae, Nya ayao mamu ayao tugae ma, weti syare Nyo ayao tugae so veano Sya arakove manuga ratayao indamu ubeta Nya bekere rai. ¹⁸ Risyamo Nyo inatutir ide syanapatambe Nai no mine so. Maisyare omaisyamo, Sya arakove onawamo Syo matutir uta wanapatambe Nai no mine vone so rai tenambe. ¹⁹ Risyo taune inaunanto Injae nai indamu ibeto Nya bekere rai tenambe, wirati indamu Sya arakove wo taune mansaunanto Nai tavon indamu ubeta Nai tugaive.”

Yesus be sambayambe vatano wanave mai tenambe

²⁰ “Arakove so bo nawirati risambayambe mansaije ramu. Yara vatano nanawirati wanave udijat weye Sya arakove so wo mansanyao wenanawamo ribe sambayambe mansai tavon. ²¹ Ibe sambayambe indamu vatan tenambe nanawirati wanave onawamo ube intabove, maisyare muno Injae winyamo wimbe intabove rinatavon muno Risyamo ibe intabove natavon.

Syare ube intabove no Winye Rinsai indamu vatano mine so wanave Winyirati nyo inatutir ide no mine so.

²² Injayo Amisy, Nya kovo ntiti nyo raugaje Rinai omamo Syo raunanto mansai to, indamu wenawamo ube intabove maisyare Winy muno Risy rimbe intabove. ²³ Risyamo ibe intabove matavon muno Winyamo wimbe intabove inatavon indamu wenawamo ube intabove tugaive. Umba vatano mine so wo raen tugaive Winyirati nyo inatutir, muno wo raen wimuiny irati mansai maisyare muno wimuiny irati Rinai wemaisy.

²⁴ Injae, ribeker indamu vatano Nyo maunande Rinai utantuna tawan irati inarijat no munijo ntiti, indamu wo kovo ntiti no Inai raen kobe. Sya kovo ntiti mammo Nyo raunande Rinai weye wimuiny irati Rinai arono munije tename so rarnari rainy.

²⁵ Injae, Winyirati ayao kakaije meweno Nai rave! Vatano mine so wantatukambe Injayo Amisy winai, weramu Risy naen muno Sya arakovo nanawiso wo raen Risyamo Nyo inatutir. ²⁶ Risy mansanyao to indamu wo naen. Muno syare Syo mansanyao tutir ava wo naen mamai kobe, wirati Sya arakovo nanawiso umuiny irati mansai vambinibe maisyare muno wimuiny irati Rinai muno Risyamo ibe intabove matavon.”

18

*Naite wo Yesus ajar
(Matius 26:47-56; Markus 14:43-50; Lukas 22:47-53)*

¹ Arono Yesus be sambayambea jewen, Wepe apa arakovo utavondi ai nawe wanya uta wo mana Kidron raotar. Nawaisy inta no no naije, weti Yesusa pe apa arakove usisa no nawaisye so ama uga rai. ² Yudas, napirati po Yesus amavun, po nawaisye so raen to, weye Yesus muno Apa arakove wanugambe raive to. ³ Weti Yudas poroto no nawaisye umaso, po naito Yavaro Amisy e ramane inta mansaugav tavon, nanawirati syeno akokoe muno vatano Parisi wo matutir. Muno naito Roma inta utavondi tavon. Naite tename umaso wo anaiyu raugav, muno perita muno yawainye raindi wo raugav tavon.

⁴ Yesus nanto irati anakotaro indati nande Ai so rai tenambe. Weti panya nanto mararai mansai umba Po manajo pare, “Are pi wapo akani?”

⁵ Wo raura akananto Ai ware, “Yesus, vatano Nasaret, Wepirati reamo akani.”

Yesus po raura kakavimbe mansai pare, “Vatano wapo akani wepi Risy.”

Yudas, vatano po Yesus amavun, teto marijat no naije. ⁶ Arono Yesus po taune aura pare, “Vatano wapo akani wepi Risy,” naite umaso upaparo mai ti waunsu akiri akare, yarawe veano mataruran vintabo no min.

⁷ Yesus po manajo rijati pare, “Are pi wapo akani?”

Wo raura akato, “Yesus, vatano Nasaret.”

⁸ Yesus po taune aura akato pare, “Syo raura wasai to: Vatano wapo akani wepi Risy. Tugae, Risyirati wapo inakani, weti syare wapo Sya arakove so mapaya inda uta kai.” ⁹ Anakotare so nande indamu mamaisyo Yesus apa ayao po raura wusyimbe rai pare, “Injayo Amisy, Sya arakovo

Nyo maunande indamu utavondi Inai, vemo inta aumandi nora.”☆

¹⁰ Simon Petrus po apa omake rakarimu, po vatano panapatambe syeno titi aije amarikoamo anem ngkove raotar ti mpatimu. Vatano panapatambe umaso apa tame mirati Malkusa. ¹¹ Naije Yesus po apa ayao raura nanto Petrus ai pare, “Nya omake ramawe akasyo no ama kokome rai! Siurijo Sya Injaya po ratayao Rinaije so syo rawatambe ramu, yara Syo ranawan.”

Yesus augaveta no Hanas ai

(Matius 26:57; Markus 14:53; Lukas 22:54)

¹² Naije naito Roma nawe, awa akarije pe, naito Yahudi wo matutire nawe wo Yesus aijar muno wo waije rave aneme raokokaisy. ¹³ Manasyimbe wo augaveta no akari Hanas ai, wepirati Kayapas apa awatea pije.* Kayapas opamo syeno titi arono tumo naije. ¹⁴ Wepirati arono wusyin pananyaube irati vatano ube akarive Yahudi mansai, apa ayao po raura we no taiso: “Vatane intabo kakaijo wansai tenambe wemi ngkov.”☆

Petrus po Yesus amamarave manasyimbe

(Matius 26:69-70; Markus 14:66-68; Lukas 22:54-57)

¹⁵ Simon Petrusa pe, Yesus apa arakovo tavondi ai kaijinta pe,† yanya itavono Yesus ai rijabe. Arakovo kaije umaso pamo syeno titi po aen to, ti tavono Yesus ai siso no syeno titi apa yavare ama wanijate rai. ¹⁶ Yara Petrus opamo sisoe ramu,

☆ **18:9** Yohanes 6:39 * **18:13** Kayapas po Hanas apa kavo raovan. ☆ **18:14** Yohanes 11:50 † **18:15** Arakovo kaije sopamo Yohanesa.

weye opamo syeno titi po aen dainy, weti nowo Yesus atuna marambe no yane ama unsanda uje rai. Maisyare wemai ti, Yesus apa arakovo kaije umawe pakauje no akiri umba po wanya man-apatambe ti nteto unsanda uje rai ranajo pare Petrus amayara siso rako? Naije mo amayar weti po Petrus augav ti siso no yavare ama wanjate umawe rai. ¹⁷ Wanya uma nteto unsanda uje rai umaso mo Petrus anajo mare, “Inya! Winyirati Vatane uma wato apa arakove inta pi win dako?”

Petrus po raura akanande pare, “Risyamo jew-ena!”

¹⁸ Arono naije nuge mbavat, weti vatano wana-apatambe no yavare umaso muno naito wo Yavaro Amisyen ramane umawe wo taname raon no wanjate naije, usayai mararai wo ravauba. Petrus poroto tet tavon ti po taname ravauba.

Syeno titi po Yesus anajo

(Matius 26:59-66; Markus 14:55-64; Lukas 22:66-71)

¹⁹ Syeno titi po Yesus anajo pare, “Nya arakovo utavondi naije onawamo are nawije? Muno Nya ananyao mamo no tai rui?”

²⁰ Yesus po raura kakavimbe pare, “Risyamo syayao nanto kakavimbe no vatano wanui mansamun. Risyamo syananyaube no yavaro sambaya ama uga rai muno Yavaro Amisyen rai, wemirati vatano Yahudi wanugambe rai. Risyo sya ananyao inta rangkokaibe wasai jeben.

²¹ Weti, veanimaibe Injae nyo inanajo rai? Nyo vatano nanawirati wo Sya ananyao raranivo Rinai manajo rati. Onawamo wo Sya ayao raen ivae.”

²² Arono Yesus po raura taije, naite umawe inta po apoam muno pare, “Ee! Mbeanimaibe nyayao soowabe nanto syeno titi wato ai? Mamaisye ramu!”

²³ Yesus po raura akananto ai pare, “Ranivara Risyo ayao inta raura ti ngkakai, weamo nyo Sya kakai namije raroron ti! Yara Sya ayao mamaisy, veanimaibe nyo inapoam?”

²⁴ Umba Hanas po naite inta matutir wo Yesus augaveta no Syeno Titi Kayapas ai. Yesus pamo aneme raokokaisyo waije umawe rajia nene.

Petrus po Yesus amamarave akato jirum muno mandei

(Matius 26:71-75; Markus 14:69-72; Lukas 22:58-62)

²⁵ Simon Petrus opamo teta po taname ravauba. Naije vatane wo anajo ware, “Tugaeya rako winyamo tavono Vatane wato aivea rako?”

Weramu Petrus po ramamarave pare, “Risiamo jewena!”

²⁶ Vatano panapatambe syeno titi arijat inta no no naije, vatane sopamo vatano Petrus po amarikoame raotaro pe nayamo aya yavaruga intaboa. Weti po Petrus anajo pare, “Tugaeya rako, syare winyirati syo naen ntavono Ai no nawaisyo wepi win dako?”

²⁷ Petrus po ramamarave akato, “Risya jewena!” Muno mamai dave no arono naije mangkuere kokebe.

Yesus augaveta no Pilatus ai
(Matius 27:1-2, 11-25; Markus 15:1-14; Lukas 23:1-10)

²⁸ Awatan ngko dave akarijo Yahudi wo Yesus auguje no Kayapas apa yavare raora, wo augaveta no gubernur Roma apa yavare rai. Weramu vatano Yahudi umaso usisa no yavaro gubernur ama uga raije ramu, indamu vemo ugwambe no Amisye amune rai nora, weye ware wo anaisyo Ono Paska raisy.†

²⁹ Umba Pilatus puje apa yavare raora umba poroto mansai. Po manajo pare, “Anangkakivano rui mirati wapare wapo rantuna Ai? Ayao kakai rui mirati Po rave?”

³⁰ Wo raura ware, “Ranivara Vatane sopamo Apa ayao kakai meweno ai ratire, weamo reamo augave de no winamune ramu.”

³¹ Pilatus po raura akananto mansai pare, “Taune wapo augaveta muno wapo mangke rapatimu Ai mamaisyo taune wapa ananyao rai!”

Vatano Yahudi wo raura akananto Pilatus ai ware, “Weramu pemerinta Roma weapamo wapare reamo mangke raugaje vatane ai indamu kakai wenora.” ³² Anakotare so nande indamu mamaisyo Yesus apa ayao purairive wusyimbe rai pare indati Opamo auseo sawa inyo kapite rai. §

³³ Pilatus de pakasiso no apa yavare rai, umba po Yesus awain. Muno po anajo pare, “Weti Winyirati vatano Yahudi awa Akarijo Titi pi Win dako?”

† **18:28** Yahudi awa ananyao mare ranivara vatano Yahudi inta siso vatano Yahudi jewene apa yavare rai, weamo vatano Yahudi umaso pamo gwambe no Amisye amune rai ti vemo tavondi awa one rai jinya. § **18:32** Arono mangke rapatimu vatane inta ai indamu kakai, pemerinta Roma po vatano napije auseo sawa no inyo kapite rai. Yara Yahudi wo orame veano vatano napije aepar ava kakai.

³⁴ Yesus po raura pare, “Winya ana nyo inanajo rai somamo taune nya ayao nyo ranajo Inai ma rako? Indako vatano kaijinta wo raura nai, umba nyo inanajo rai rako?”

³⁵ Pilatus po raura akananto Ai pare, “Risiamo vatano Yahudi pi risya jewena! Yara taune Winya kawasae muno syeno akokoe nanawirati wo naugav wo naunande rinai. Weti Nyo raura kakavimbe: Winyamo animaisye mi Nyo raveti ngkakai?”

³⁶ Yesus po apa ayao raura pare, “Sya munijo ibe akarive rai mamo mine so ma jewen. Weramu ranivara munijo ribe akarive rai mamo mine so ratire, weamo Sya kawasae usivuinyo rinaorai indamu vemo vatane wo rinaijar inaugavere no akarijo Yahudi mai nora. Weramu tugaeya, munijo ibe akarive rai mamo nori rati mine so ma jewen.”

³⁷ Weti Pilatus po anajo akato pare, “Maisyare omai ti, Winyamo akarijo titi inta pi Win dako?”

Yesus po raura akananto ai pare, “Risya ivae, mamaisyo nya ana ndaura wato rai. Sya inavaki muno Sya ide no mine somamo indamu Syo ayao tugae raura kakavimbe. Are nawirati ubeker unanta ayao tugae rai, onawamo wo rinaraniv.”

³⁸ Pilatus po raura pare, “Ee! Syo ratantona ayao tugae mamo vatan inta nanto rai kakai.”

Umba Pilatus puje apa yavare raora, muno po raura aje vatano Yahudi mansai pare, “Rinanto ayao kakai inta rai Vatane so ai ramu.

³⁹ Weramu taune wapa koano watavondi raivea nsiridi to mamo arono Ono Paska nde nande, weamo syo vatano makova intabo apaya apa

mangke rai. Weti wabeker syo Yesus, wapa Akar-ijo Titi Yahudije so, apaya wasai rako?”

⁴⁰ Weramu vatano wanui umaso ugwagwaimbe akaseo Pilatus ai ware: “O! Wato pa nyo apaya nora! Yara Barabas opi nyo apaya!” (Barabas sopamo vatano panaonoambe, muno be marovave pemerinta Roma ai.)

19

*Wo mangke raugaje Yesus ai inda kakai
(Matius 27:26-31; Markus 15:15-20; Lukas 23:12-25)*

¹ Arono naije kobe Pilatus de pakasiso muno po vatane matutir wo kaijo wai rairiro ama atu rai rakoato Yesus ai. ² Naite wo anansinao maisyare wanyavi ramaisy rauseo rakariwaibe akari rai ti ama anansinao mpatota no akari rai. Muno wo ansuno nsintair manawadi inta raugasyo Ai ti po rave, maisyare akarijo titi po rave ramaisy. ³ Umba naite umaso uta ude wo raura wanaikebe Yesus ai ware, “Winyirati Akarijo Titi Yahudi pi Winy!” Muno wo apoamo rani rani.

⁴ Umba Pilatus pakauje akato muno po raura akaje vatano wanui mansai pare, “Waperade! Syare syo augave syuje wasai, indamu wapo raen risyamo inanto ayao kakai inta raijo Ai ramu.”

⁵ Arono naije Yesus puje, anansinao mpapako akari rai muno Po ansuno nsintair manawadi rave. Pilatus po raura mansai pare, “Waperade! Napi so!”

⁶ Arono syeno akokoe nawe, naito wo Yavaro Amisye ramane nawe wo Yesus aen, wo akekebe

kobe ware, “Auseo sawa inyo kapite rai! Auseo sawa inyo kapite rai!”

Pilatus payao de mansai pare, “Wapo augav, muno wapo auseo sawa inyo kapite rai, yara risyamo nanto Apa ayao kakai inta raije ramu.”

⁷ Vatano Yahudi wo raura akananto Pilatus ai ware, “Mamaisyo reama ananyao rai weamo Vatane sopamo mangke raugaje Ai indamu kakai, weye Po taune aura pare Opamo Arikainyo Amisy.”

⁸ Arono Pilatus po maraniva jewen, jani dave kobe. ⁹ Weti de pakasiso no apa yavar muno po Yesus augave siso tavon. Umba Pilatus po anajo akato pare, “Winyamo vatano nori rui?” Weramu Yesus po ayao inta raura akananto Pilatus aije ramu. ¹⁰ Weti Pilatus po raura akato pare, “Nyonaе nyayao nande inaija rako? Nyo raen risyamo sya vambunine ma indamu syo napaya, muno sya vambunine ma indamu syo nauseo nsawa inyo kapite rai!”

¹¹ Yesus po raura akananto Pilatus ai pare, “Nya vambunine wato Amisye wepi po raunande nai. Weti vatano po rinamavun ti po inaunande no winaneme rai opamo apa ayao kakai manakoe winya rakivan.”

¹² Arono Pilatus po Yesus apa ayao umaso ranaun, beker pare po apaya. Weramu vatano Yahudi ugwain ware, “Yesus po taune aura pare opamo Akarijo Titi. Maisyare omai ti Opamo be marovave Akarijo Titi Roma ai. Weti nyare nyo apaya, weamo wimbe arakobe Akarijo Titi Roma aije ramu.”

¹³ Pilatus po ayao so raraniva jewen, umba po Yesus augave uje indamu po mangke rapatimugo Ai. Weti seo tuna no apa kursijo titi rai no wanijate ama tame mirati Wanijate Oram. (Wanijate so raura ayao Yahudi raijamo Gabata.) ¹⁴ Arono naijeamo masyote yasyin, masyoto namije mamoo vatano Yahudi awa masyoto wanakangkanive irati Ono Paska rai mije. Pilatus po raura nanto vatano wanui mansai pare, “Wapa akarijo titi pi so!”

¹⁵ Vatane ugwagwaimbe kobe ware, “Aubaisy! Aubaisy! Auseo sawa inyo kapite rai!”

Pilatus po manajo pare, “Mamaisy aje rako? Syo wapa akarijo titi auseo sawa inyo kapite rai rako?”

Syeno akokoe wo raura akananto ai ware, “Kaisar Roma obo pirati reama akarijo titi pi je!”

¹⁶ Pilatus po Yesus aunanto no vatano wanui umaso maneme rai indamu wo auseo sawa inyo kapite rai. Umba wo augav ti uta kobe.

Yesus auseo sawa inyo kapite rai

(Matius 27:32-38; Markus 15:21-27; Lukas 23:26, 33-43)

¹⁷ Yesus puje po taune apa inyo kapite ranawan to no pukame ama tame mirati Akari Pae. (Mine so raura ayao Yahudi raijamo Golgota.) ¹⁸ Pukamo namije naite wo Yesus apaku auseo sawa inyo kapite rai. Vatane jiruma nanairati yauseo syawa atavon, inta sawa no anem ngkakai muno inta sawa no anem ngkov muno Yesus sawa no yasyin.

¹⁹ Yesus apa inyo kapito sawa raije mamoo Pilatus po vatane inta atutir po ayaowe so ratoo rauseo rapaku ama vone rai mare:

SOPAMO YESUS, VATANO NASARET

AKARIJO TITI YAHUDI

²⁰ Vatano Yahudi wanui wo ayao ratoe umaso raen, weye muni namije mararaijo pukame umaso rai. Ayao omane umaso ratoe ayao Yahudi rai, ayao Roma rai muno ayao Yunani rai tavon. ²¹ Syeno akokoe upari, weti wo raura nanto Pilatus ai ware, “Vemo nyo ratoeya nyare, ‘Sopamo Akarijo Titi Yahudi,’ wemai nora! Nya ayao omane wato mamaisye ramu. Yara nyo ratoeya nyare, ‘Yesus po taune aura pare: Risyirati Akarijo Titi Yahudi.’ ”

²² Weramu Pilatus po awa ayao rasakinav pare, “Syo ratoe no tawan weye wemi ratoe to.”

²³ Naite wo Yesus auseo sawa inyo kapite raija jewen, umba wo Apa ansune raijar wo ratodija mambisy, weti naite inta apaura inta rai, inta apaura inta rai. Weramu Apa ansuno akoe nami-rati ama pame mewen dai yara ranari anawadive wemamo ngko dave ti wo raotadi ramu. ²⁴ Weti wayao vambinibe mansai ware, “Vemo wamo ansuno manawadi so raotar nora. Yara wamo aikarae rapatin dai, are pirati mo arorona apaura rai.” Ana umaso nande indamu mamaisyo Ayao Amisye mo raurairive no wusyinoe rai mare:

“Wo Sya ansune ratodijo taune mansai muno wo aikarae rapatin dai

indamu wo Sya ansune raugav bintabo.”✧

Maisyare omai ti, naite wo Yesus apa ansune ratodi taije maisy.

²⁵ Mararai no Yesus apa inyo kapite rai, Apa akoyam, muno Apa akoyo rijata, muno Klopas apa

anamu ama tame mi Maria, muno Maria Magdalena. ²⁶ Arono Yesus po apa akoya raen muno Apa arakovo anuga no ai rave* aen tet nande akoya ratavon, payao aje akoya rai pare, “Ingko, soamo Sya arakove sopamo nya arikainye pi so!” ²⁷ Muno payaude Apa arakova ai tavon pare, “Nya ingkoa mi som! Syare nyo raeranande.” Weti arono Yesus kakai, arakovo napije po Yesus apa akoya raugav no apa yavaruga rai indamu po raeranande.

Yesus kakai

(Matius 27:45-50; Markus 15:33-37; Lukas 23:44-46)

²⁸ Yesus po anakotare raende tenambea mewen bintabo to, umba Po raura pare, “Rinawa ngkangkamandi!” Apa ayao umaso Po raura indamu mamaisyo Ayao Amisyen mo ratoe rai.✧

²⁹ Weti wo maimare raugasya rayansundijo angguriyo nsaisyine rai, umba wo ransuisyo uvi rai, wo rareanse no Yesus awa rai. ³⁰ Yesus po angguriyo nsaisyine umaso ramanama jeben, umba payao pare, “Mamai bintabo to.” Naije akari nsawa aruranaje muno Po anawayo aunanto no Injayo Amisyen aneme rai.

Naite wo Yesus atukam

³¹ Arono naije masyoto vatano Yahudi wanakangkanive irati awa masyoto sambaya rai. Muno masyoto sambaya nde nande umaso omamo Masyoto Akoe. Vatano Yahudi ware masyoto sambaya omamo vemo vatane inta sawa

* **19:26** Arakovo Yesus anuga no ai rave wepamo Yohanesa.

✧ **19:28** Mazmur 22:15, 69:21

no inyo kapite rai nora, weti ude wo Pilatus anajo indamu po apa naite matutir wo vatano mausea usawa inyo kapite rai nawamo majo radaundi indamu ugwenen, umba wo maveaje. ³² Weti naije naite ude wo vatane jirum yauseo syawa Yesus atavon yajoe radaut kobe. ³³ Weramu arono ude mangkepano Yesus ai, wo aen kakai to weti wo ajoe radaute ramu. ³⁴ Yara naite inta po weyame rave Yesus atukam no Apa taugande rai. Naije kobe Apa mavu nsororop muno mana ntavono rai. ³⁵ Risyi Yohanes syo ayaowe so ratoe, syo ana nande Yesus ai umaso raeno taune inamije rai to, weti syo ratoe so indamu vatano wanui wapanave. Sya ayao syo raura kakavimbe so ana tugae; syo raen omamo tugae ma. ³⁶ Anakotare so nande indamu mamaisyo Ayao Amisye mo ratoe rai mare, “Apa pae mamu inta radaute ramu.”✧

³⁷ Muno aneme kajjinta mo raura tavon mare, “Vatano wo atukame indati usayai muno wo anyanyut.”✧

Yesus antuna

(Matius 27:57-61; Markus 15:42-47; Lukas 23:50-56)

³⁸ Umba vatano munijo Arimatea inta apa tame mirati Yusup de po raura nanto Pilatus ai. Yusup umaso pamo Yesus apa arakovo tavono aive inta pije, weramu opamo tavondi maninimbe vayave weye po vatano Yahudi masyaniv. Weti Yusup umaso de no Pilatusa nui indamu po Yesus anasino kopa ranajo ai. Umba Pilatus po

✧ **19:36** Bilangan 9:12; Mazmur 34:20 ✧ **19:37** Zakaria 12:10

ramayar, weti Yusup de po Yesus anasino kopa raugav. ³⁹ Muno Nikodemus de atavon. Wepirati de Yesus ai arono wusyinoe namane inta rai. Deye so, po manino mur inta raugavo manino gaharu inta ratavon, ama mangke ma kilo tenamara eane abusyin. ⁴⁰ Yusupa pe Nikodemusa pe yo Yesus anasino kopa raugav, umba wo ansuno mpopero nsauman veano akepan, umba wo manino mbovove rauvaro Ai, mamaisy irati vatano Yahudi awa koano wo vatane mantuna rai.

⁴¹ Nai mino Yesus auseo sawa inyo kapite rai di so, nawaisye inta mararai no naije, muno mino namije ama uga rai aipapo inta ntuna rai, ta nggwanyina nene muno vatane inta antuna rai rainy. ⁴² Masyoto namije mamo vatano Yahudi awa masyoto wanakangkanive irati awa masyoto sambaya rai muno aipapo somamo nggwara-vainye ramu, weti wo Yesus augaveto antuna rai.

20

Yesus kovakato no wene ama uga rai

(Matius 28:1-10; Markus 16:1-8; Lukas 24:1-12)

¹ Ari Minggu ama awatan ngko dave nuge mpampunamija nene, Maria Magdalena moronto mo Yesus apa aipapo raen, oramo veano ama unsanda rauguji mamo manso to. ² Mansanan makare, nde nande Simon Petrus muno Yesus apa arakovo anuga no ai rave yai,* mare, “Injayo Yesus opamo vatane inta wo auguje aipapo rai to muno wamamo wamantatukambe irati augaveto raije rai.”

* **20:2** Arakovo Yesus anuga no ai rave wepamo Yohanesa.

3 Naije Petrusa pe, Yesus apa arakovo kai umawe pe ibesea yanya yurija yo Yesus apa aipapo raen. 4 Yansanan kava, weramu Petrus maneai, yara arakovo kai umawe pavave rave, weti to nanto wusyimbe aipapo rai. 5 Naije to benanto peravo aipapo ama uga raito vayave, peratoamo ansune vasye bo mi ntami. 6 Umba Simon Petrus de nande dijabe, naije siso kobe no aipapo ama uga rai. Weti po ansune vasye veano Yesus akepan raen ntuna no min. 7 Muno ansune vasye mamaun veano Yesus akari rakepan omamo raakuvi mumuimbe ti ntami nggwara-vaimbe ansune vasye manakoe rai. 8 Umba arakovo kai uma de wusyimbe to siso aipapo ama uga rai tavon, po raen ti panave. 9 Arono naije Ayao Amisye ama urairi mo Yesus aura kovakato no wene rai ma nyanta rai rainya nene. 10 Umba arakove umaso inyajiv no yavar.

Yesus aroron kakavimbe Maria Magdalena rai

11 Maria Magdalena ntet mararai no aipapo rai muno moyov. Umba mbenanto ti meravo aipapo ama uga raito. 12 Mo naito Amisye jiruma yaen. Naite umaso aya ansune mpoper, onayamo itantuna no Yesus apa antuna rai we rai. Inta tuna no akari rai muno inta pamo tuna no ajo rai. 13 Naite umaso yo Maria ranajo yare, “Akoewiny, mbeanimaibe nyoyov?”

Naije mo raura akananto mare, “Risya Injayo Kurune pamo vatane wo augaveto ti aumandi muno syantatukambe wo augaveto raije rai.” 14 Mayaowa jeven, naije nsakinav meravo rakiri akare rati, mo Yesus aeno te no naije. Weramu

mantatukambe are pi so. ¹⁵ Umba Yesus po raura nanto rai pare, “Akoe winy, mbeanimaibe nyoyov? Are pirati nyo akani?”

Maria mo rakarae mare vemo vatano po nawaisye raeranande pa. Weti mo anajo mare, “Anui, winyirati nyo sya Injayo Kurun auguje, nyo augaveto nyo antuna no kaijinta rako? Syare nyo augaveto tuna no ruijamo ndaura indamu rito syo augav.”

¹⁶ Yesus po apa ayao raura akananto rai pare, “Maria!”

Maria nsakinav merav akananto no Yesusa nui, umba mo awain nanto ayao Yahudi rai mare, “Rabuni!” (ama ine mare Kurune).

¹⁷ Yesus po raura nanto rai pare, “Vemo nyavakanande Rinai nora, weye syana to Injae ai rainya nene. Weramu syare nyoronto nyo Sya ayao so raura Risyaa arakove mansai, ndaura taiso nyare, ‘Syare iseo syakato no Sya Injae Amisye ai, wepirati weapa Injayo Amisye tavon.’ ”

¹⁸ Weti Maria Magdalena moronto kobe, mo raura Apa arakove mansai mare, “Syo Injayo Yesus aeno inamije rai to!” Umba mo Apa ayao nami po raugaje raije raura kakavimbe mai tenambe.

*Yesus aroron kakavimbe Apa arakove mansai
(Lukas 24:36-39, 47-49)*

¹⁹ Ari Minggu namije ama masyote ndea ngkaumur kobe, Yesus apa arakove wanugan no yavare inta rai, wo yavaro namije ama unsanda rakeke tenambe weye wo vatano Yahudi masyaniv. Arono naije, Yesus de nande teto papabe no awa yasyin muno Po raura aje mansai

pare, “Saumano Amisye maje wasai!” ²⁰ Arono Po ayao saumane raura aje mansaija jewen, naije Po apa paro no anem unane rai rarorono mai, muno Po apa taugandeo weyame veano ratukame raroron tavon. Apa arakove so mananibe weye wo Amisy Yesus aeno mamije rai.

²¹ Yesus po kove raura intabo akato pare, “Saumano Amisye maje Sya arakove wasai! Naisoamo Risyo wasatutir maisyare muno Injayo Amisye po rinatutir.” ²² Po apa ayao so raurawa jewen, umba Po anawayo veano mansamawisy asyo muno Po raura pare, “Syare wapo Anawayo Vambunine raugave nsiso wasanuga rai! ²³ Ranivara weapo vatan inta apa ayao kakai rapaya, weamo Amisye po rapaya kobe. Muno ranivara weapo ayao kakai rapaya jewen, weamo Amisye po rapaya jewen tavon.”

Yesus aroron kakavimbe Tomas ai

²⁴ Arono Yesus arorono manasyimbe irati Apa arakove mansai, Tomas tuna Apa arakove matavone ramu. Tomas umaso pamo Yesus apa arakovo mansano abusyin eane jirum inta piye, apa tame rawain tavonamo Didimus (weye arikainyo tapume pa). ²⁵ Weti arakove umawe wo raura Tomas ai ware, “Injayo Yesus de aroron kakavimbe reansai muno reamo aen to.”

Weramu Tomas po raura akananto mansai pare, “Risyamo syo paku ama vava no aneme rai raen dainy, muno syo kawije rausiso pakuge ama vava rai rainy, muno risyavakananto syo Apa taugandeo weyame rave ratukame raija dainy. Maisyare omai ti, risyamo syanave ramu.”

²⁶ Masyote kaumandei jakato, Yesus apa arakove wakare wanugan tenambe no yavare umawe rai. Arono naije umba Tomas tuna matavon. Yavare umaso ama unsanda rakeke tenambe, weramu Yesus de nande te no awa yasyin muno Po kove raura aje mansai pare, “Saumano Amisy maje wasai!” ²⁷ Naije Po raura nanto Tomas ai pare, “Nyeravaje nyo inaneme raeno namije rai muno nya kawije raugaje ntami rai nyo ranaun. Muno nyavakare nyo Sya taugande raijar. Nanuga mamaun akato nora, soamo nyanave!”

²⁸ Tomas po apa ayao raura nanto Yesus ai, “Tugae, sya Akari muno sya Amisy pi Winy!”

²⁹ Umba Yesus po raura akananto ai pare, “Winyamo nyanave weye nyo rinaen to. Kove ngkov irati vatano wanave weramu wo rinaeno mansamije rai jewen!”

Ana mbewar ti Yohanes po apa bukuge so ratoe

³⁰ Yesus apa anapaporainyo kaijinta mamomanui, weti Apa arakove wo raeno mansamije rai, weramu ratoe tenambe bukuge so raije ramu.

³¹ Weramu so ratoe tenambe indamu wapanave Yesus ai, wepirati Arikainyo Amisy muno Mesiasa pije. Weye wapanave Ai, weaveti wakova nuge nuganuije rai.

21

Yesus arorono Apa arakove mansai no Onae Tiberias

¹ Yesus arorono Apa arakove mansai jakato no Onae Tiberias muno Apa po aroron kakavimbe no taiso. ² Onae umaso Apa arakove so wanugan: Simon Petrus, Tomas awainamo Didimus, Nataniera vatano Kana no propinsijo Galilea, Sebedeus apa arikainye jirum, muno Yesus apa arakovo kaije jirum wanugambeve no naije. ³ Simon Petrus po raura nanto apa arakove mansai pare, “Arakove, risyare ito syo jiane rakani.”

Weti wo raura akananto ai ware, “Reamare reantavondi.” Naije wuruta kobe, usea nyomane rai. Weramu namano waravainyoe ma jiane inta ijaro mai ramu.

⁴ Arono uma pare tipu seo kobe, nuge mbabar, naije Yesus de tet no nayave ruk. Weramu Apa arakove wo aen kakavimbe jeben muno wantatukambe vatane sopamo Yesusa piye.

⁵ Yesus po manajo pare, “Inya! Arikainye weap! Wapo jiane inta raugav ivae rako?”

Wo raura akananto Ai ware, “O, jeben dave!”

⁶ Yesus po raura akato mansai pare, “Wapo wapa pame ramaugakasya no wapa nyomane ama ranijo wasanem ngkove rai, indati wananta jiane inta mansai jaje.” Naije wo awa pame ramaugo rai kobe, inda jiane manui rave nsiso rai, mangke rave ti wo rakarimu kakai!

⁷ Yesus apa arakovo anuga no ai rave po raura Petrus ai pare, “Injayo Yesusa pi wato!” Arono arakove umaso po raura pare, “Injayo Yesus pi wato!” naije kobe Simon Petrus po apa ansune rave anasine raora (weye anasine no kakavimbe) muno sopatasyo no onae. ⁸ Weramu arakovo

kaijinta utantuna no nyomane rai kobe, wo raugav udiat sisa. Muno wo pame rakarimu nsiso no yawa, namirati jiane ntairi rai. Uborae ti udiat sisa so ama waravainye ma meterije tename radani. ⁹ Weti una no nyomane rai wasya, umba werata wo raen tanamo raondi ti mbe riambe muno jiane inta ramero rai muno roti inta ntami tavon.

¹⁰ Yesus payao nanto mansai pare, “Wapo jiano nsawa wapa pame rai wato inta raugav wade no so.”

¹¹ Simon Petrus seo no nyoman muno po pame rakarimu nsiso no yawa. Pame so ntairi jiano manakokoe rai, ama manui nseo no tename kaururum eane abusyini eane mandei. Jiano namije manui rave, weramu pame mpatimu rai jewen.

¹² Yesus payao nanto mansai pare, “Wade, wapisyi kai.” Apa arakove so ubeker ware wo anajo, “Are pi Winy?” Weramu usamane wo anajowi, weye wo aen tugae Amisy Yesus wepi so. ¹³ Umba Yesus nanto pangkepano mansai, Po rotije raugav muno Po raunanto mansai, muno Po jiane raunanto tavon.

¹⁴ Yesus aroron kakavimbe Apa arakove mansai ama susyo mandeije mi so, arono kovakato no wene rai.

Yesus po Petrus apa muinye ranajo

¹⁵ Arono wisyisya mewen, Yesus po Simon Petrus anajo pare, “Simon, Yohanes apa arikainy winy, nya muinyo Rinai manakoe ya mo arakove so awa rakivana rako?”

Petrus po raura akananto Ai pare, “Tugae, Injae, risya muinyo Winai nyo raen to.”

Yesus po raura akato pare, “Nyo Risya maero domba mansakum.”

¹⁶ Umba Yesus po anajo rijati akato pare, “Simon, Yohanes apa arikainyo winy, wimuinyo Rinai tugaeya rako?”

Petrus po raura akananto Ai pare, “Tugae, Injae, risya muinyo Winai ma nyo raen to.”

Yesus po raura akananto Simon ai pare, “Nyo Risya maero domba maeranande.”

¹⁷ Susyo mandei Po anajo akato pare, “Simon, Yohanes apa arikainy winy, wimuinyo Rinai tugaeya rako?”

Petrus animaumbe, weye Yesus po anajobe tutira susye mandei to pare, “Wimuinyo Rinai tugaeya rako?” Weti Petrus po raura akananto Ai pare, “Injae, Winyo anakotare raen tenambe, weti sya muinyo Winai nyo raen to.”

Yesus po raura akato pare, “Nyo Risya maero domba mansakum. ¹⁸ Syo raura tugaive: Arono wingkamuram, taune winyo nya ansune muno nya tarandine rave, nyanya nto no rui vayave mamaisyo taune nya bekere rai. Weramu arono indati wimbe vatan anuive rave, winaneme raurananto vatano kai mansai wo raokae yara wo nau-gaveta no varoro nyonae raijoe rai.”* ¹⁹ Maisyare wemaisy, Yesus po Petrus apa wene raurairive wusyimbe pare indati vatane wo aubaisy weye panave Yesus ai, muno apa wene maisyare naije mo Amisye apa kovo ntiti raroron.

* **21:18** Yesus apa ayao urairije so ama tunato raije no taiso: Arono indati Petrus be vatan anuive rave, weamo naito Roma wo aneme raokokaisyo wajije rai muno wo auseo sawa inyo kapite rai indamu kakai.

Umba Yesus po Petrus awain pare, “Petrus, soamo ntavono Rinai!”

Yesus apa arakovo anuga no ai rave

²⁰ Arono Petrus sakinav peravo akiri akare, po Yesus apa arakovo anuga no ai rave aeno tavondi po yarijade. (Opamo tuna pangkepano Yesus ai arono namano wisyi tenambeowe muno wepirati po anajo pare, “Injae, are pirati indati po namavun?”) ²¹ Petrus po arakove so aen ti po Yesus anajo pare, “Injae, arakovo napiso indati aveare rui?”

²² Yesus po raura akananto Petrus ai pare, “Ranivara ribeker syare arakove so kova no tawan ao risyakare mine so rai, omamo no taune Risya syo rapatimuge rai. Weramu winyamo ntavono Rinai vayave!”

²³ Arono naije arakovo utavondi Yesus ai wo ayao namije rampampambe wo raura ware arakovo napije pamo indati wene nande ai jeven. Weramu Yesus opamo apa ayao ama ine no tai maisye jeven, yara apa ayao mamu pare, “Ranivara ribeker syare arakove so kova no tawan ao risyakare mine so rai, omamo no taune Risya syo rapatimuge rai.”

²⁴ Risyrati arakovo Yesus po inaura umaso. Muno risyi syo anakotaro nande tenambe umaso raen to, muno syo ratoe so. Reamo raen ayao ratoe tenambe somamo tugae rave.

²⁵ Anakotaro kai Yesus po raijar manui. Ranivara anakotaro namije ratoe nanentabove tenambe, syo rakarae bukugo namije manui muno mine tename so mamauno rai.

Ayao amisy urairi wanyin
New Testament in Yawa (ID:yva:Yawa)
Perjanjian Baru di Yawa

copyright © 2011 Wycliffe Bible Translators, Inc.

Language: Yawa

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Yawa

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2022-03-11

PDF generated using Haiola and XeLaTeX on 11 Nov 2022 from source files
dated 29 Jan 2022

f32aa90e-2509-5f04-a3ab-17abf547cfde